

道光遵義府志

遵義府志卷四十一

年紀三

國朝

世祖章帝順治元年流賊張獻忠陷全川惟遵義保境自守

甲申六月獻忠陷重慶八月率眾三十萬陷成都

全川鼎沸獨遵義為王祥所守

綦江志

獻忠僭號大西國王改元大順據有全蜀惟遵義

一郡及黎州土司堅不下

明史流賊傳

通鑑輯覽書獻忠僭號在十一

月

獻忠聲言邊郡新附免其三年租賦蠻人貪賊財物往往弭首羈縻全川惟遵義一郡不下獻忠侈

然有帝蜀之心矣

後寇紀畧

明以其前大學士王應熊爲兵部尙書督師駐遵義討蜀寇

八月明以前大學士王應熊爲兵部尙書督師專討蜀寇起前寧夏巡撫樊一蘅爲兵部侍郎總督川陝軍務時張獻忠已據全蜀惟遵義保境自守應熊與一蘅避其地命應熊督師一蘅總督軍務討之又遣御史米壽圖巡按四川命吏部簡堪任

監司守令者從壽圖西行應熊等乃縞素誓師開  
幕府傳檄諸郡舊將會師大舉會巡撫馬乾復重  
慶副將朱化龍等復龍安茂州一蘄乃起舊將甘  
良臣爲總統合參將楊展等所攜潰卒得三萬人  
尋復敘州而副將會英連敗賊軍聲大振亦受一  
蘄節制其他據城奉征調者洪雅則曹勛范文光  
松茂則詹天顏夔萬則譚宏譚詣一蘄遂移駐納  
溪與應熊會瀘州檄諸路刻期並進獻忠頗懼

事皆在明年  
通鑑輯覽

二年明閣部王應熊專辦蜀寇駐劄遵義督師命總

兵曾英李占春等分兵鎮防重夔外禦流寇內捍遵

疆蜀東賴之

陳志

二年冬明閣部王應熊至綦各官謁見雖大權在握而呼應不靈遂至遵義與王祥會

綦江志

三年王祥以兵趨成都

祥勇悍著聞爲九園子隘官守遵義賊不敢窺至

是進兵討賊

蜀志

四年春正月流賊餘黨孫可望等陷遵義

三年十二月我

大清兵至順慶流賊張獻忠伏誅其僞將軍孫可望李定

國劉文秀艾能奇偽都督白文選馮雙禮等俱潰

走川南時故明川中諸將競擁兵自固本注督師大學士王

應熊及王祥在遵義巡撫馬乾副將會英在重慶

監軍副使范文光及曹勛在洪雅監軍僉事詹天

顏在松茂譚宏譚詣在夔萬兵部侍郎總督川陝

軍務樊一蔣在納溪居中調度與應熊會瀘州尅

期並重慶會英兵敗死于江賊遂陷綦江督師大

學士王應熊退走永寧山中本注尋病卒踰月賊

陷遵義入貴州境通鑑輯覽

獻忠敗死可望與其黨李定國劉文秀艾能奇白

文選等率眾竄入川南襲重慶陷綦江及遵義復

由遵義入據貴陽貳臣傳

獻忠據蜀僭號以延安人孫可望爲軍師已而疑之乃以爲平東將軍而以李定國爲安西將軍劉文秀爲撫南將軍艾能奇爲定北將軍陰制之獻忠戮蜀人幾盡次及其兵將可望等懼值肅王至保寧獻忠中流矢死遂率眾奔貴州破遵義入據貴陽官民避去賊四路搜捕箐洞殺掠無算

貴州通志

可望入遵在正月十二日

楊明吾譜序

正月初四日老神仙先至遵義鄉城聞待可望至卽行屠哭聲震天死者滿野蓋顯單騎道服夜入城見老神仙老神仙素震蓋顯名約不屠居近三

十里蓋顯曰軍師知大西王所以敗乎屠戮太盡  
無人與守故使軍師今日至此今四川止存一邊  
義若再屠軍師及大將軍無進退地矣老神仙曰  
譬如公言欲羈蓋顯蓋顯曰老夫耄矣今皇帝中  
興之主軍師誠能與大將軍匡復社稷他日垂名  
史冊稱中興將相前日作賊之非賴此以掩願軍  
師無忘老夫此言老神仙垂頭歎息顧蓋顯已持  
雙劍出門呼壯士持馬矣自此可望所過民皆安  
堵至貴州卽稱臣於今皇帝皆蓋顯此言悟之昭

民撰鄭蓋

顯行略



初獻賊據全川惟憚遵義王祥賊誅可望等東走

大兵追至重慶以餉盡還遂陷遵義竄雲南

蔡江志

三月我

大清兵西征至遵義孫可望聞風屠貴陽城遁去

大軍旋引還保寧

貴州通志

丁亥固山額真李取遵義畱總兵柏承馥巡道董

顯忠撫之旋以孤軍還保寧

陳志其纂志云我兵追賊至遵九月兵還

駐重慶賊陷遵義入貴州

大兵追至重慶故明巡撫馬乾敗死遂入遵義以餉乏旋

師王祥等因復取保寧二郡故明總督侍郎樊一

衛再駐江上爲復窺全蜀計乃列上善後事宜加諸將功狀于桂王由榔由榔拜一衛戶兵二部尙

書加太子太傅祥等進爵有差

通鑑輯覽

肅王豪格射獻忠墜馬死其養子孫可望李定國劉文秀艾能奇等收敗卒奔重慶四年可望等自綦江奔遵義三桂偕肅王入川分兵徇地下重慶及遵義可望由黔入滇賊眾雖走川中兵四起最强如楊展王祥李占春余大海袁韜武大定曾公子等各有眾數萬擁兵聚餉互相聯絡我師亦以川中殘破北還順慶三桂仍駐漢中

劉健庭聞錄

八月肅親王豪格奏分兵征勦遵義夔州等處川

寇悉平

蔣之駿  
東華錄

四年三月初八日肅王李固山入遵殺賈譚二家

兵馬百姓剃首歸服追孫可望至黔命董道顯忠

柏將軍永馥鎮防招安

楊明吾  
譜序

按貴州通志云可望屠貴陽遁去畱偽總兵柏

永馥巡道董顯忠守之今以陳志及楊氏譜序

考之永馥顯忠乃肅王還師畱以鎮防遵義招

安貴陽者而冠以可望之偽通志大謬

十月明桂王由榔命將王祥復據遵義

八月十二日忠國公王祥奉永歷命相度邊土又招安免死牛票上銀六兩大糧每兩納穀八石十三里各分總攝時值兵荒頻仍饑餓死於巖穴者相枕藉無人收瘞米斗當是升字銀三兩五錢蕎麥每斗價銀十三兩如珠如玉盡爲兵獲民不堪命戊子巳丑民存皮骨楊明著譜序

丁亥十月故明將王祥率兵數萬至遵復據之分

土分民驕兵索餉士民苦之

陳志

八月明永明王大學士堵允錫走永順土司尋赴貴

陽抵遵義乞師於皮熊王祥明史允錫傳以大兵破

冬姚黃賊餘黨

增二字

袁韜寇綏陽

志

按姚黃卽姚天動黃龍皆川賊起明崇禎間巡撫陳士奇勦滅之袁韜者沔人因姦傭事發逃投响馬繼姚黃爲賊獻賊入成都乘勢據蓬州儀隴南郡諸地數年間烏合愈眾分爲十二大隊順治五年

大清四川巡撫李國英偵知韜等連營遂寧之曠羅垣欲犯保寧乘乏食急擊大敗之時川中諸賊或稱四家或稱十三家韜外尙有武大定等十餘人七年僞秦王將白文選取遵義遂進攻嘉定韜

大定降文選後投誠

本朝見明史蜀碧及四川通志又考綦江志云順治五年姚黃餘黨袁韜武大定等十三家賊出大巴渠巫夔間突從南川綦江取道出杜市珞璦市沿江一路搜殺雞犬無遺又云五年正月初三日姚黃餘黨忽從南川路來綦搜殺如洗以人爲糧斗米三十金無買處於是羣虎白日出遊下城樓闕破殘人戶四野荒涼據此韜等搜殺綦江在五年正月初以綏陽志書四年冬寇綏互按之必于是冬先由正安入至綏陽以至綦

江其行道時日皆相契斯時遵郡東北州縣之  
慘亦必有如綦志所云者

### 六年王祥於遵義發種招耕

春王祥於綦江置劉楊埧卽思灘埧立三莊設官  
自遵義發牛種招耕難民多往應佃其時虎狼之  
害愈虐行者雖五七同羣執器械前後中間必有一  
失是年孫可望等已得雲南與劉文秀白文選  
李定國俱臣服桂王要求封秦晉諸王號綦江志  
呂大器欲遍觀川中諸將以察其能否入遵義王  
祥具橐韃迎甚恭呂知其無能爲太息謂乾德及

監軍道陳計長曰袁武忍而好殺祥尤庸懦不足  
蜀事尙可爲乎一日于石砭司夜遁走入黔之獨

山州鬱鬱疽發背卒

綬寇紀畧

七年孫可望使白文選攻遵義殺王祥

秋九月孫可望由雲南東襲貴州匡國公皮熊走  
清浪衛追執奪其兵又遣白文選攻破遵義忠國  
公王祥自刎降其眾二十餘萬張先壁馬進忠皆  
歸於可望勢益强

通鑑輯覽

袁韜嘗欲取遵義攻王祥破之已而祥招烏合六  
七萬分爲三十六鎮勢復張識者固知其不足用



平東之再自滇以出也遵義其首難祥一戰於烏

江河而大潰尋被殺

緩寇紀畧

庚寅冬可望出師破貴陽定番侯兵於貴筑北攻

遵義忠國公王祥自刎死遂復有黔中之地

滇考

庚寅九月十二日秦王孫可望在黔發兵搶遵敵

殺忠國公王祥追至羅桿台王師潰敗秦王遣張

扈衛復招士民穿棕衣紙幾番湯火可憐已極條

銀變輸穀米共計二石有餘又有皇草皇柴折價

至黔中上納所徵條銀十兩幫補義兵一名器械

銀五十餘兩不敢不從一切六畜五穀絲麻之類

無隙可逃

楊明吾譜序

十月僞秦王孫可望遣將王自奇率兵逐王祥據

遵祥兵潰勢窮刎於真州之鳳凰山

陳志

九月劉文秀白文選以兵至烏江王祥力戰不勝

自刎死文秀降其眾二十萬盡取遵義地初獻賊

入蜀畏祥不敢窺遵義前後拒守凡八年至是敗

死聞者惜之時已進爵蔡江伯

蜀碧

九月孫可望在滇遣其將劉文秀白文選馬寶等

取遵義收王祥於烏江祥敗自刎三十六軍將軍

亦逃散文選降其眾二十萬盡收遵義

級草志

九月孫可望在滇遣兵圍蜀劉文秀白文選以兵至烏江王祥戰不勝遂自刎其眾二十萬盡降祥死遠近紛亂十一月出綦江至重慶旋復還遵義是月下河李鷁子名占春來綦搶掠名曰打糧會孫可望兵來招安趕至白渡將人物搶回

綦志

按輯覽綦志蜀碧並言王祥死烏江陳志獨云真州鳳凰山楊氏譜序又云羅桿台考羅桿台在今正安州南或書作羅簡台楊序記所目擊與陳志真州合當得其實

遵開八年辛卯偽秦王孫可望遣裨將田子祿守

內廠

設局暴徵酷法殘民復陷水火

陳志

按今府城東府學署卽子祿設錢局處居民猶能道之掘土往往獲永歷錢

九年壬辰夏孫可望遣白文選等由遵義出重慶會劉文秀馮雙禮等於嘉定以圖成都

綦江志

夏五月定南王孔有德率輕兵出河池向貴州以大軍駐柳州接應孫可望乃謀入犯使李定國馮雙禮由黎平出靖州馬進忠由鎮遠出沅州會於武岡以圖桂林劉文秀張先璧由永寧出敘州白文選由遵義出重慶會於嘉定以圖成都可望言於由榔

封定國西寧王文秀南康王定國進攻靖沅武岡

俱陷之有德還守桂林

通鑑輯覽

七年文選攻遵義九年五月文選由遵義出重慶

以圖成

都貳臣傳

十三年丙申時遠近傳有抹臉魔夢中面皮忽失去如剝男女夜圍坐不敢寐無故自驚是年故明桂王

尙差官丈

田畝基江志

按通鑑輯覽是年春二月李定國走安隆以桂

王由

榔奔雲南

十四年丁酉故明桂王由榔遣將李定國討僞秦王

孫可望敗於交水設官遵土陳志

九月孫可望叛桂王與晉王李定國交攻可望大敗走長沙乞降于我

大清仍請兵攻桂王纂江志可望本獻忠餘孽既乃臣事桂

王邀求爵命而又稱兵挾制反戈相向及爲李定國所敗始以窮蹙來歸實爲險賊之尤通鑑輯覽本注

十五年六月我

大清兵克遵義

蜀師至三坡劉正國拒戰大敗自水西奔回雲南

大兵遂克遵義通鑑輯覽

戊戌夏五月固山額真侯墨李恢復遵義題委道府縣各官撫輯殘黎草除苛政民困始甦

陳志

歲在己亥民難已滿

大清平

西王李固山入遵平治一應差賦悉還其舊

楊明吾譜

序

十五年春吳三桂請南征初孫可望詣經略洪承疇降大都封義王具言雲南可取狀三桂欲自以爲功上疏曰孫李治兵相攻今可望投誠歸化變亂之際人心未定大兵宜速進貴州報可乃分兵三路中路經略洪承疇信郡王鐸尼由湖廣入東

路征南將軍趙布太固山線國安由廣西入西路  
三桂由四川入二月二十五日三桂發兵漢中三  
月四日至合州四月三日至重慶二十五日至三  
坡洪關石台關將軍劉鎮國踞險設伏以守敗之  
晦日克遵義獲糧三萬餘石招降郭李愛等得兵  
五千有奇象一五月十一日入貴州七月還遵義  
督師大學士文安之等以水師襲重慶三桂還禦  
之白文選以三桂之還遂自七星關進營生界窺  
遵義十月

大兵三路俱集戒期入滇十一月十日三桂自遵義進兵



敗白文選於七星關時馬寶守可渡河文選敗寶亦奔李定國遂以永明王入緬十六年正月三日三桂遂入滇二月三日由滇西追永明王五月六日淮國公馬寶以眾四千餘人自瀾滄江外來降由此遂臣服三桂

建寧錄

十四年

三桂爲

辛酉大將軍國翰

按國翰都統李國翰

爲定西將軍進征貴

州十五年發漢中過保寧順慶至合州盡獲沿江戰艦定國等據石壺關拒險三桂令騎行山麓步陟顛以發其伏悉驚潰遂下遵義克開州國翰

卒三桂還駐遵義時經略大學士洪承疇寧遠大將軍宗室洛託由湖南進貴陽征南將軍卓布泰由廣西進都勻安遠大將軍信郡王多尼統禁旅至三桂馳會於平越府之楊老堡議三路出師三桂自遵義赴天生橋關聞文選據七星關遂繞出烏撒土司境進霑益州逆臣傳吳三桂傳

按陳志之固山額真侯墨李明吾譜序之李固山皆謂國翰也

十四年

上命承疇同寧南大將軍貝子洛託相機攻貴州十五年二

月疏言貴州地勢情形及三路進取雲南機宜四月抵貴陽城中文武官俱先遁

上命信郡王多尼爲安遠大將軍率師之貴州與四川貴州

兵進攻雲南六月承疇疏言臣前有三路進取全局一疏冀不致兵眾擁集爭糧乏食及至貴州見各府州縣衛所僅畱空城卽有數百數千石米穀八旂兵陸續經過二三日輒罄盡惟省倉存米七千餘石稻穀四千餘石足供一月食用臣所從兵皆分布鎮遠偏橋興隆清平平越等處各自買米并尋野菜和米充饑投誠官兵暫駐三日卽改發

天柱會同黔陽等縣及沅州以就糧貴州山深地  
冷秋穫皆在九月臣遣官勸諭軍民土司苗民預  
納本年秋糧之半接濟滿洲兵月米令四川一路  
兵駐於遵義烏江休息有舊日運糧處廣西一路  
駐獨山州兵亦可就近購糧信郡王大兵自六月  
初旬自荊州進發所需口糧尤多數倍臣已檄沅  
州糧米速運鎮遠積貯令隨征各官分路採買令  
常德道府各官製備布口袋二萬餘并梭套木架  
繩索解送鎮遠又于天柱石阡思南思州平越各  
府州縣衛所及土司苗人募夫役給工食逐站遞

詔赴平越會議信郡王由中路過關嶺鐵索橋抵雲南省計

運至平越及新添衛所可不誤師期九月承疇奉

一千餘里解餉銀三月攜糧十五日運轍漢軍攜糧五十五日平西王吳三桂由遵義過七星關抵雲南省城計一千五百餘里先中路兵十日起行征南將軍畢布泰因南寧有賊難以兼顧議由貴州廣西邊界平浪永順垣威透山出安隆所黃草垠羅平州抵雲南省城計千八百餘里先四川兵十五日起行

武臣傳洪疇傳

十五年春三月

大清兵三路入雲南由蜀入者自三坡取遵義由楚入者  
自鎮遠抵黔由粵入者抵獨山州冬十月三路兵  
俱集信郡王自北至會於楊老堡戒期入滇李定  
國拒雞公背圖侵貴州遣別將守七星關抵孫界  
立營窺遵義以牽蜀師十二月

大清兵出遵義由水西取烏撒守將棄七星關走霑益

大清兵入安隆

王鴻緒  
明史稿

十五年七月晉王李定國秉黃鉞出師令李承爵  
出左路壁黃草坝祁三昇出中路壁雞公背白文  
選出右路壁遵義之孫界坝自三方告急屢促定

國師期輒云有待時初秋乃出兵先由中路出關  
嶺後李承爵告急乃移師黃草塢久之踰石關營  
於遮炎河祁三昇壁雞公背之絕頂糧少逆艱士  
不宿飽孫界垣孤懸滇蜀之表聲援不及識者俱  
以爲憂十月晉王有遮炎河之捷十二月晉王兵  
敗於遮炎河於是雞公背孫界垣之師俱大潰無氏求野館

十六年

按綏陽縣城中有是年孟冬所立觀音閣常住  
燈田碑後書銜云

欽命平西王藩前挂定治將軍印右軍都督府左都督受封  
榮祿大夫王明池

欽命平西王藩前興寧伯王興碑文有云自丙申秋至綏閣  
今三載考庭聞錄載十五年六月二十三日以  
七千餘人降者有興寧伯王興總兵王明池且  
云時白文選以兵守七星關令興等還舊營於  
是興等來歸據此當是永明遣李定國設官邊  
土時卽令興等守綏至文選令還駐舊營來歸  
朝廷仍授原官歸三桂部下令守遵綏也

聖祖仁皇帝康熙元年總督李國英統師會勦餘寇川東平



是年逆藩偽知州金睿遷真安州治於古鳳山麓正志

按志言逆藩非是時三桂尙未反

遵義府知府吳三元始設府屬關場二稅

關稅八場稅十四所

定額報部

遵都紀事詳賦稅

按三元後曾受吳三桂偽官見川志

二年清丈田畝

桐梓卽志

是年夏吳三桂遷移眷屬夫馬煩勞紳士有所不

免抬運至桐梓縣界交替有道路死者其志

五年復奉行清丈田畝

陝志

七年奉

旨採木遵義四川巡撫張德地至遵勘奏艱運罷之詳本

八年始建遵義桐梓綏陽仁懷四縣學詳學

十二年滇藩吳三桂謀逆陷蜀及遵桐梓

自十二年冬至十九年春吳逆殘寇據遵義逃兵

肆掠慘獨甚至二十年始恢復之志

十二年十一月二十一日吳三桂發兵反殺巡撫

朱國治以明年為周元年偽號昭武皇朝

十二年十一月逆藩吳三桂有滇黔楚

蜀之地遷真安州治于德溪里之土坪正安

十三年四川巡撫羅森提督鄭蛟麟總兵譚宏皆叛

降賊全川俱失

武功紀略

十三年逆藩吳三桂遣賊將王屏藩等分道陷四

川州縣兵躡遵桐

州

十四年吳逆散偽割各路煽誘

江蘇志

十五年復遷真安州治於古鳳

正安志

十五六年兩年俱勦辦吳逆戎務倥傯

十七年八月吳三桂死於衡州

墓志

十八年吳逆孫世璠僭元宏化於雲南其偽國公馬

寶據遵義

十七年八月三桂死寶與賊黨擁立其孽孫世璠  
十八年五月簡親王喇布給益陽知縣徐撰參議  
道銜齎詔招撫寶殺之十月

上降勅諭寶曰爾等本係吳三桂藩下人三桂反叛爾等率  
黨抗拒大兵或非本懷若爾悔罪歸誠前罪悉赦仍論功  
敘錄標下將士概從寬宥酌量加恩爾其盡釋疑衷勉圖  
後効寶抗拒如故大兵復湖南廣西寶遁貴州據遵義提

督周卜世破之寶棄城走

通臣傳

按世璠以十九年東行駐貴州其年遣其偽編  
修徐元祚以偽勅至遵義封其偽太傅馬寶豫

國公考庭聞錄十八年六月

大兵敗吳世琮於新村山吳國貴死於黎平雙井鋪時賊  
營山上國貴將中軍馬寶王緒分列左右王緒  
飛砲中額死據此則其時寶在黎平而與寶僞  
勅在十九年三月是寶至遵義當在十八年冬  
間寶有謝表以十九年七月上而庭聞錄又云  
寶自遵義走尋甸云云又云二十年七月擒馬  
寶陳志言恢復遵義在二十年與東華錄合是寶棄  
遵義當以二書爲得寶在遵據今副將署爲不  
府

十九年吳逆餘黨譚宏等再亂全川震動

景江志

按東華錄十九年九月將軍吳丹還瀘州十月  
仁懷失守罷將軍吳丹以鄂克濟哈領其眾意  
此時仁懷先復而復失也

二十年三月提督周卜世復遵義府馬寶棄城走

練

錄

是年收復雲貴餘孽盡平冬間凱旋師過遵

陳志

十七年吳三桂死于衡州十八年以固山貝子章  
泰爲定遠平寇大將軍十九年十月大破賊三桂  
孫世璠自貴陽棄城走雲南貴州平二十年二月

與廣西兵會攻雲南大敗之賊將馬寶糾眾萬餘  
自遵義來援五月遣都統希福等大破之呂合寶

亡走

彭紹升  
測海集

今遵義鄭場五龍寺一劍一繡戰袍傳爲吳逆僞  
國公馬三寶物三寶卽寶字成壁秦人因斃命下  
獄與獄中巨盜同逸出爲盜爲人反覆故又號兩  
張皮狡黠善戰人羨其勇唐初有驍將馬三寶者  
遂以此名呼寶劍袍蓋其據遵時所畱也綬採  
吳逆之變其黨有吳之茂胡國柱王屏藩等授總  
督等僞職而四川布政吳一元提督鄭蛟麟等俱

爲之用基通雲貴故康熙十七八年間或奉偽號  
鋪戶門牌往往兩面應役纂志

是年奉

命採木遵義松茂道王隲入

覲奏罷之

詳本政

二十五年清丈田畝

二十六年裁各府軍民字

冊

按自明平播設遵義平越二軍民府至是奉裁  
軍民二字今府儒學印頒易自乾隆十六年五  
月文尚云遵義軍民府儒學印乃鑄印局誤依



舊文爲之不得據謂裁軍民字在後

三十年丈田增賦

三十一年丈田畢各甲造清冊投遞戶房又索各甲雇人清算寫冊供費甚累秋征仍照老畝加派每畝外加二十畝徵收據云一畝需銀一兩四五錢有至二兩者當時銀甚艱難是以逃糧者多纂以明遵義知縣王佐聖入名宦祠懷忠

四十三年知府王元弼詳請遵義府專設考棚咨部

報准

遵郡紀事

按先是府屬生童歲科試皆就重慶府棚至是

專設試者始免跋涉之苦文教益盛詳在學步門

五十二年

命內大臣賞全蜀兵

李先立康公德政碑云我

皇上御極五十二年參養制兵不惜數十萬之金錢茲逢  
六旬大慶更惓惓不已發帑金以大資天下

分命大元帥康公同內大臣頒賞全蜀窮鄉僻壤額設營

之地車轍馬迹遍親厯焉十月之朔八日按臨邊  
義歡聲動地竹馬郊迎我康公慈祥愷悌樂易雍

容輕騎減從不累  
檢閱之餘教戒周詳隨材  
獎勵其撫愛士卒之至意真不啻家人父子之親  
夫以康公同

天使宣亘古未遇之恩膏諸士卒觀亘古未有之盛事且其

頌康公推愛之深仁爰勒石以紀盛石刻在府治東鳳朝閣外

按康公名貫未詳

世宗憲皇帝雍正二年改真安州為正安州以恭避

世宗廟諱下一字偏傍

五年以四川遵義府一州四縣隸貴州正安

勸民自首田畝並行清丈桐梓

高宗純皇帝乾隆四年移建仁懷縣城於亭子坝

七年丈田丁條糧合併積算以歸畫一

桐梓  
知志

以舊縣城去府遠中間別無州縣控制乃建新城  
於距府百八十里之亭子坝移知縣駐之移府通  
判駐舊城分仁懷所屬十里中之仁懷土城河西  
三里轄焉

桐梓  
知志

二十五年請帑修建府城

二十七年修桐梓縣城

三十五年桐梓知縣胡守業以苛斂致縣生員李苑  
鳳等聚眾生事皆論死

是年桐梓大旱斗米千錢時值金川用兵知縣胡守業同邑紳楊某蘇某科派軍需一月一派刻士民公議戳朋比爲奸邑民苦不能支有舉人楊正林會試歸與庠生李苑鳳蔡天爵蕭志學等言在外親見謄黃

聖恩寬大如遇歲歉地方官卽據實詳報請免徵糧竝開局施賑今吾邑之害乃汚吏及劣紳所爲非

皇上意也苑鳳等因約同李芳龍李芳虎令狐子聽王仕錫趙式碧趙毓龍趙毓虎趙毓雄江仕龍李文安段管等共二十四人爲首製黃旗書難民二大字

列二十四人名目集眾千餘在邑之葫蘆塢飛  
廟結盟祀神一面斂金一面舉苑鳳天爵志學三  
人赴京部控議以候部控歸齊赴省鳴冤苑鳳等  
去至山東以事羈畱芳龍等在家見苛政愈出因  
激變率眾入城打蘇楊二姓房屋牽其妻孥跳尼  
市闌以辱之隨打入各官署劈枷放犯文武官當  
卽通報葫蘆塢一帶奸民造反圍城三日乞救各  
大憲帶兵至桐副將某在關帝廟祭刀出兵甫至  
山門天忽雨雹昏黑如晦因未往剿後

欽差侍郎錢維城來至婁山關一路鋪民貿易如故芳龍等

二十餘人方跪接呈訴錢公知非叛逆乃下令不許擅殺平民只照旗上有名之人喚至官渡河訊供得悉京控苑鳳等三名年貌繪圖通行緝拿蕭蔡二人在東已獲苑鳳逃至四川江津縣旋被獲苑鳳少年美才情辭激烈錢公偕各官反覆訊得激變之由誓以一官抵一民隨將苑鳳等二十四人解省除李友安開釋外皆斬之激民變之官吏亦斬絞是役也株累綦慘有平民被指爲叛黨而自縊者有婦女被兵役擄不屈而死者冊  
將檔

乾隆五十九年九月平老鴉窩私鑄嘯聚賊

曾石保者桐寨接壤之奸民也弟兄四人肆行鄉曲居平虐謔窩盜稍觸其怒或白晝殺人官不能窮究乾隆五十一年間因彼地界連黔蜀山林幽阻潛引黔西大定諸不逞輩鼓鑄私錢於時人數無多捕之則徙其窟或以賄免後遂藐玩至五十七八年招集至數千人就桐界老鴉窩設立爐房數百晝夜傾鑄烟火連霄立曾石保爲外掌櫃劉榮厚綽號白溫爲內掌櫃張仲何綽號飛等又四五人爲外當事飲血結盟廠內最高處曰香堂供關帝像刑具旁列架上插五色旗旗各有頭目



管領每初二十六放炮點齊人眾戈矛林立繞廠  
凡數週其所鑄錢通行渝瀘各岸沿途稍有齟齬  
卽點人蟻附去如與問罪師必得直而返惟不欺  
附近居民法甚嚴肅以米鹽竹木所取資也廠有  
列肆貨賄之屬無不有諸少年輕身便體絲履鮮  
衣者無慮數十百人郡邑胥徒間有通盟好者最  
喜博遠方之人如有所負輒拘囚非贖取不得釋  
官長稍稍聞之飭差密拏則掩其爐熄其火謂已  
鳥獸散其習慣如此乾隆五十九年七月巴縣界  
石場民有蔣文維周登才者挾貨往貿易嗜賭

去大爲惡輩所苦欲呈首巴縣適巴令淡士灝已  
偵知一應不法情形與知府趙秉淵通行密稟時  
福中堂康安總制全蜀風節凜然一面飛檄黔省  
諸官吏一面札渝城密派兵將先遣遊擊李發先  
銜枚疾走夜由綦城外經過總鎮袁國璜由跳石  
河路七月二十九日抵老鴉窩賊等謂往常故智  
耳權伏林莽尙有守錢不去者嗣見兵絡繹馳至  
彌布山谷有三軍司命字黔兵亦飛旗迭至始大  
駭時部曲已散呼應不靈各各奔逃惟曾石保率  
多人拒捕官兵奮勇直前賊披靡連夜招集散亡

屯聚白雲寺居然結陣袁總鎮用過山鳥不應賊逼前再募轟鳴傷斃多賊兩省兵呼哨交馳聲震動諸鄉勇亦分頭堵截除格殺外當擒獲二百九十餘人獨渠魁逸去數日於劉家河擒獲劉榮厚又數日擒獲張仲何惟曾石保不可得官兵鄉勇密密排布自青山瀛山青羊市諸邨落無不窮搜人心惶惶直至九月中旬始於扶歡埧峽口大風埕將會石保兄弟擒獲已餓數日也罪人已得將一應草棚爐竈錢模砂板等項悉行燒燬起出私錢並未鑄小錢無數著黔省先撤兵去俘囚繫累

由綦解渝皆焦黑藍縷煽爐打炭之夫從前之紉袴乘馬者通無有矣適按察司林雋由大寧解邪匪至渝九月二十二日各府道會同研審會石保劉榮厚親供確鑿所爲諸不法情真罪當恭請

王命押赴市曹斬決傳首兩界懸示餘犯川黔楚豫無不有人而以黔西畢節爲多除現拿獲外有中路捉轉者有逃至家越宿拿至者按律軍流發遣有差惟桐梓縣知縣范崑以舉人蒞事數月曾石保家有品鎮川黔扁署崑銜鈐印蓋匪等通蠹役所爲者拿問革職其人循循儒素典史杜名超亦革

職自此遂無私鑄者而逞兇不法之徒亦從此絕

跡紫江志

櫻桃窩去老鴉窩二十里苗民積居草屋數十家  
藉種地養賊遠近肆行偷竊民間牲畜什物雖事  
主追至眼見而莫如何大爲一方害當官兵燬錢  
爐時鄉勇中有黠者謂此窩亦私鑄巢穴遂羣趨  
之前暫試焚一屋官弁傳呼勿燒平民焚者故誤  
傳令於是火四起呼之愈急燒之愈速人聲喧闐  
語不可曉亦不辨誰何頃如灰燼諸苗男婦荒荒  
竄去盜從此絕跡土人語曰炮打白雲寺帶累櫻

桃窩冊

嘉慶十一年平仁懷縣牛欄溝結匪

綦之西南二百餘里與桐梓江津合江接界曰牛欄溝地實屬仁懷縣四面懸崖林深菁密上有平土三層可種山糧二百餘石嘉慶八年仁邑民袁廷瑛與族袁伯玉自其祖父爭界不休至廷瑛受產後隙益深遂邀集苗民羅把士等多人盤踞其上以壯聲勢日久弗散廷瑛勢無所支遂給籽種爲久遠計苗以類相招絡繹而至囊幾盈千愈難酬給卽依崖立上中下三賊黨各有頭目晝夜下

山分路剽掠遠近牲畜牛馬被擄者甚眾莫敢誰  
何行旅亦爲戒嚴又於山上設立重樓卡子並滾  
木礮石備官兵勦捕黔中大吏風聞已久未悉虛  
實罔有先發其事者候補知縣張九穀署綦聞之  
駭異十一年正月通密札於仁懷令崔本謂宜相  
機無貽養癰患時崔被別案牽連赴省典史王光  
祖覆書言已致函崔令俟其回再行協辦乃二月  
接崔手函謂蠢茲小醜烏用張皇且待鴟張之時  
再爲舉動復稱川省歲旱仁邑土廣民稀竄入者  
半係蜀人詞大與張齟齬不得已疊致同州輔車

之義勸其會哨溫水與桐津諸縣協理崔仍坦不  
介意賊猖獗愈甚會仁邑民與袁伯玉糾眾齊圍  
放炮擊賊反自斃一人張恐竄逸綦界或致繹騷  
乃專差防堵更令實訪人數並晝夜作何事差密  
以聞遂通稟於勒制府及司道各憲重慶知府王  
用儀爲移文遵義知府趙遵律飭仁懷縣帶領官  
兵約三月初二日會哨溫水先懸示各處賊猶怙  
惡及見大兵雲集始知驚懼張喝令嚴拿並拆毀  
其重樓營卡兵差分應當捕獲羅把士張二王穆  
麻子等三十餘人一一就縛時遠近被害久見張



爲除害無不人人欣躍致牛酒凡張上下爭爲扶  
舁肩輿如蟻之附且同聲呼張青天者三響應山  
谷觀者無不色動平定後案歸仁懷辨結崔徹底  
審究始悉廷瑛伯玉爲爭界幾釀巨禍按律將廷  
瑛等充發界歸欵而賊黨遂平

蔡江志

二十年三月十六日川匪數百人竄入遵義副將恆  
安督兵民截緝迫渡烏江至養龍司擒數十人餘賊  
潰散雲貴總督伯麟貴州巡撫曾燠開單具奏黔省  
緝捕川匪出力人員十月十三日奉

上諭伯麟等奏明緝捕川省匪賊出力人員據實保奏一摺

本年三月川省匪徒劉大五等竄入黔界糾眾搶劫黔省  
文武官員聞信後卽帶領兵役拿獲五十餘犯使匪徒不  
能沿途勾結緝捕甚爲認真當經降旨令該督撫查明出  
力人員據實保奏茲據伯麟等查明開單具奏其首先覺  
察帶練往捕之知縣項邦枚着以知州陞用分帶兵練獲  
犯多名之副將恆安着交軍機處記名知州李璣守備鄭  
起發千總張鳳翰吏目孫苞俱着加一級紀錄二次協同  
緝捕之知州彭大偉知縣嚴昌鈺府經歷楊德峻守備陳  
元龍把總於仕侶劉建勳俱着加一級以示獎勵該部知  
道欽此

道光九年川匪韋紹淵等擾正安州署知州陳五色  
悉擒之送四川總督問擬

四川總督 奏爲訊明定擬仰祈

聖鑒事竊照四川南川縣匪犯羅聲甫傳習邪教糾眾滋  
事經川省文武督率兵勇殲擒撲滅訊據所獲各  
犯供稱其教係羅聲甫與韋紹淵在雲南開化地  
方拜從陶月三所學用清水一碗焚燒檀香畫符  
念咒吃水之人卽有神附體自能舞弄拳棒等情  
奏奉

諭旨飭令臣等派委委員前往將陶月三一犯嚴拿到案

訊明是否另有邪術惑眾情事據實具奏等因欽此當  
查南川縣匪犯滋事因界連黔省邊境恐被竄擾  
先經貴州撫臣嵩溥飭委臬司何金前赴查辦卽  
據正安州截獲韋紹開等犯究出所習之教係未  
獲之韋紹開傳授韋紹開又學自陶月三咨滇查  
緝業經臣伊里布派委寶寧縣知縣周誦芬協同  
該處文武在於開化府屬安平廳邊境落水洞地  
方將陶月三及其妻子談法拿獲解省查無不法  
字跡供認以符水傳教屬實且開化亦有傳習之  
人隨經臣等據供追緝夥黨一面將拿獲該犯陶

月三緣由先行覆奏在案茲據將習教夥犯韋洪周章藻能盛維義等名先後獲解到省飭發員雲南府知府馬毓林武定直隸州知州施道生候補知州劉德銓逐一審明由藩臬兩司詳解前來臣等率同司道親加嚴鞫緣陶月三卽陶泰月籍隸四川南川縣於嘉慶十七年春間在貴州接境之正安地方貿易患病遇正安民人李添成因與交好李添成告以能用符水治病止用清水一碗焚燒檀香口中念咒以手指在水碗上畫符三道頭二道符水吃之可以治病治瘡第三道符水吃下

卽有神附體自能舞弄拳棒名爲少林神打男婦  
皆可學習陶月三聽信請其如法治病果有效驗  
隨拜李添成爲師李添成授以符咒并告以伊曾  
傳過李源音李添成旋亦身故陶月三在正安妻  
舅張沅著家因爲張沅著治病曾將符咒傳此張  
沅著十八年陶月三因聞雲南開化山地寬廣四  
川人流寓者多卽帶同妻子至開化安平廳落水  
洞地方種地度日未將符水傳授與人亦無人知  
其能會符水之事至道光七年陶月三因將墾種  
田地賣盡家貧起意將前學符水傳徒交結藉此

斂錢因李添成傳給之時無一定名目卽將符水取名爲一碗水教先傳與其子陶漣子表姪韋洪周商令如遇熟識願學之人密令出資從習卽有已獲之盛維義張有祥已故之唐學相劉小二尹老三拜師傳習內張有祥因不能畫傳習未成未給謝錢餘俱每人給錢數百及千文不等又陶漣子向已獲素識之楊老八令其習教可以爲人治病獲利楊老八被誘聽信卽拜從學習謝給錢文嗣因自己治病無效心生懊悔並將符咒忘記亦未再習後陶漣子又將符水傳與已獲之楊老七

因楊老七不能畫符傳言未成未給謝錢又韋洪  
周將符水轉傳與其子韋藻能并已獲之張中愚  
及未獲之韋登高馮成涼等內張中愚不能畫符  
傳習未成未給謝錢餘皆每人給錢數百文後韋  
洪周又誘令已獲之馬雄鼎習教代人醫病取利  
馬雄鼎亦聽信從習謝給錢文嗣因治病無驗被  
人斥辱悔未再習又韋藻能亦將符水轉傳與已  
獲之韋才廣未獲之韋才華已故之尹老二等各  
給謝錢文又盛維義轉傳與已獲之謝洸志梁淙  
成並尹老三轉傳與已獲之劉遠福韋才廣轉傳



與已獲之章槐湘章才華轉傳與已獲之胡金雲均因未能畫符傳習未成又章登高轉傳與已故之章老二章藻俊至八年七月間有南川縣民章紹閑因販碗前赴開化與陶月三熟識聞知陶月三有一碗水教求向學習陶月三應允卽將符咒傳授章紹閑給謝錢千文章紹閑因所傳之教雖好惟滇省開化地方瘠苦信服人少且開化安平等處查拿趙應龍王士林等案叛逆要犯嚴緊若傳人眾多必被獲破勸令陶月三與伊回至四川南川縣傳徒斂錢如斂錢無多可以糾眾搶掠倘

被官兵查拿難以抵敵卽逃赴越南小朝地方藏  
躲陶月三以搶掠滋事係屬冒險不允偕歸韋紹  
閑卽自行回籍並據陶月三又供羅聲甫未經與  
韋紹閑同到開化迨後韋紹閑回南川或係途遇  
羅聲甫同回至韋紹閑如何又教傳與羅聲甫又  
復互傳多人抑或南川滋事之人另得李添成李  
源音等傳授是以教名錯雜不一盡出於韋紹閑  
所傳陶月三遠在開化均未知悉臣等查陶月三  
所習符咒半係鄙俚不經請降邪神之語因用水  
一碗燒香畫符念咒卽取名爲一碗水教此外並

無另有邪術惟該犯既起意取立教名傳徒斂錢恐被惑之人尙多別有不法情事或與逆匪趙應龍李應川等犯聲息相通密爲勾結當卽加以刑訊堅供實係先傳與伊子陶漣子及韋洪周等人繼又傳與韋紹閑其陶漣子等轉傳亦供止楊老八等十數人並無婦女學習韋紹閑因滇省查緝匪犯嚴緊慮破獲回至四川滋事陶月三委不同謀亦無別項不法及與趙應龍等勾串爲逆情事究詰不移案無遁飾查律載傳習白陽白蓮八卦等邪教習念荒誕不經咒語拜師傳徒惑眾者擬

絞立決爲從年未逾六十及雖逾六十而有傳徒情事俱改發回城給大小伯克及力能管束之回子爲奴被誘學習尙未傳徒改發雲貴兩廣極邊烟瘴地方充軍等語此案陶月三傳習不經符咒倡名爲一碗水教傳徒斂錢川民韋紹閑習教回歸惑眾滋事其子韋紹閑勸令同回告以傳惑糾眾如被查拿卽逃往小朝藏躲之語雖未允從回川入夥亦與明知謀叛不首無異第知謀叛不首罪止擬流自應照傳教例從重問擬陶月三犯合依傳習白陽等邪教習念荒誕不經咒語拜師傳

徒惑眾爲首例擬絞立決陶漣子韋洪周韋藻能  
盛維義韋才廣等五犯習教已成輾轉傳徒均年  
未六十應依爲從例俱發回城給大小伯克及力  
能管束之回子爲奴楊老八馬雄鼎雖經習教係  
被哄誘後因治病無效均已悔不再習亦未傳徒  
情未可原自應原照問擬應將楊老八馬雄鼎照  
被誘學習尚未傳徒發極邊烟瘴充軍例俱發兩  
廣極邊烟瘴充軍發配折責安置張有祥楊老七  
張中愚謝兆志劉遠福梁淙成章槐湘胡金雲等  
八犯因不能畫符均學習未成與習教已成有間

應于爲從遣罪上量減一等各杖一百徒三年定  
地折責充徒先經習學之張沅著及此次習學之  
唐學湘劉小二尹老二尹老三韋老二韋藻俊等  
業經先後病故應毋庸議傳授陶月三符水之李  
添成并傳習之李源音據陶月三供已在川病故  
但係一面之詞現經咨川飭查陶月三之兄陶泰  
甲在籍不知陶月三傳教情事應免置議失察牌  
甲照例責懲逸犯韋登高韋才華馮成淙等嚴緝  
獲日另結除咨明川省及飭滇黔各屬一體查緝  
韋紹閑等犯務獲並供招咨部外所有臣等訊明

定擬辦理緣由恭摺具奏道光九年五月二十六

日

十一年九月以桐梓縣水災貴州巡撫嵩溥請借帑  
開戴家溝河

護西道朱德燧知府于國琇勘請開戴家溝稟竊  
照桐梓縣被水一案奉憲臺兩司行奉撫憲批以  
桐梓縣銷水被沙石淤塞年久屢經開鑿迄無功  
效竟應如何開挖足資宣洩庶免再被水患之處  
飭會督確切查勘辦理等因奉此護道與卑府遵  
卽馳赴桐梓督同署縣王汝辦賑委員署綏陽縣

陳令帶同各紳民前往切實履勘查得桐梓縣城外里許有官渡河一道各處山溪水皆匯流入此爲壑由官渡河至距城十里則水分兩又右爲葫蘆洞現今消水左爲周家洞洞口穿山而過距城十五里之馬江埧春夏水漲葫蘆洞消洩不及漫至馬江埧則四山環峙並無出路以致逆流泛濫附郭一帶悉被浸淹此本年漫溢成災之由來也據土人傳說從前原有方家洞併行消水後來該洞因泥沙淤塞年久遂致失迷究竟淤自何年舊跡安在詢諸耆老均亦不能言指護道於道光三



年任桐梓縣時曾與卑府捐廉倡首同各紳民於馬江坝之前壽國山山腰開洞以期疏洩詎開至七八十丈洞內幽深且多堅石人力難施因而中止是尋洞與開洞事屬渺茫前已勞而無功此時可無庸再議護道等公同悉心籌度欲桐民永免水患自應開挖明河方爲一勞永逸之計查馬江坝前各山之下有水坎河一道發源於界連遵義縣之大關西流而至仁懷縣匯入蜀江馬江坝高水坎河低若能於各山開一河道自可順勢導流復查馬江坝前而如壽國山茅蓋山及艾蒿坪等

處均高二十五六丈至三十餘丈不等兼以巖石  
嵯峨開通殊非易事細勘惟有戴家溝一處山形  
地勢均較各處稍低且由坡頂至馬江埧逐段就  
低一帶均係山田熟土察看尙易開挖即使中遇  
大石或繞僻或開鑿明河之工程顯而易見羣相  
施力料亦可無梗阻之虞隨用旱平弓尺先由馬  
江埧丈量計高自一二尺起逐層遞加量至戴家  
溝坡頂田面實高一十五丈五尺長三百一十一  
丈其戴家溝後面山勢陡立斜下亦均係墾就山  
田由坡後下至水坎河約五六十丈有奇祇須開

至半坡卽與馬江埧平等水可順流而直達水坎河矣惟該處既有居民田土今擬由此開河自應給與買價據各紳耆向該業戶商議約需地價千金內外至開河工費核實估計必須銀萬兩方足敷用此項工程之興廢關係閭閻之安危該紳民患切身家靡不樂輸從事無如地瘠民貧且被災凋敝現實力不能捐據舉人溫綸沛同眾紳民公呈懇請先於司庫代借銀五千兩俾得趕緊興工所借之銀自明年秋起分作三年按糧攤徵解繳歸款是否可行伏乞憲裁又卑府與委員等前捐

撫卹銀一千五百兩蒙諭知護道此災應行動項  
所捐之銀將來仍各發還卑府與委員等願將此  
項卽捐作開河工費又護道亦擬捐銀五百兩添  
助巨工尙有不敷容再勸捐護道等現飭諭該紳  
民公舉妥實首士將來專司經理其督工一切查  
署縣王牧此次辦理災務實心撫濟民情愛戴據  
眾紳民懇求請卽俯從飭令督辦該縣典史沈錫  
治並署綏陽縣陳令均肯於此事盡心出力綏陽  
縣僅距桐梓一站可以朝發夕至並請飭委該員  
幫同監工無庸另行委員以省薪水糜費所有奉

委查勘酌定開河緣由合肅具稟道光十一年八月

貴州巡撫嵩溥奏請開桐梓縣戴家溝摺爲委員  
勘明開河洩水懇請借動庫項以資工費恭摺奏  
祈

聖鑒事竊照桐梓縣本年夏間被水成災經臣委員查勘  
撫卹並令確勘應如何開挖河道足資宣洩籌議  
辦理旋據護貴西道朱德璉遵義府知府于國琇  
稟報賑卹災民完竣督率署桐梓縣王鎮疆暨委  
員帶同紳耆等確切履勘桐梓縣治四面環山城

外有官渡河一道水分兩叉右爲葫蘆洞現今消  
水左爲周家洞潛流而至馬江坦坦前俱係山坡  
春夏水漲葫蘆消洩不及漫至馬江坦水無出路  
以致逆流泛濫附郭一帶悉被浸淹從前屢經開  
碶以期疏洩因有堅石阻碍迄無成效欲免水患  
必須另開明河勘得地名戴家溝山勢尙低可以  
開河一道直達蜀江水坎河暢流而下惟開挖處  
所多係民田熟土計其買價並開河工費擲節估  
計約共需銀一萬一千餘兩該紳耆溫綸沛等各  
願捐辦因被水後一時力有未能稟請於司庫借

項發給分年攤徵歸還由司道核議具詳前來臣查桐梓縣僅有小河分注崖洞是以積水難消每逢大雨時行居民不免水患今勘有可以開河疏消之處應卽熟籌趕辦此項工程需費甚鉅旣非例應官修未便請動正帑但念該縣地瘠民貧每歲正供僅輸二千餘兩本年被水地方應納銀米已奏請緩至明年秋收後分作二年帶征所需開河工費等銀一萬一千餘兩除該管道府縣等現已捐銀二千兩外尙需銀九千餘兩茲紳耆等一時無力設措稟請借項征還自應籌欸借給以示體

卹查司庫並無閒欸可動惟報部工費項下存有餘銀係畱備文職養廉公費之用現非急須支發似可借用合無仰懇

聖恩俯准在於公費項下借支銀九千兩發交遵義府督同桐梓縣查謹慎董事之紳士經理公費趁此秋後冬初趕緊辦理以期年內告成庶免春水再淹且可以工代賑于被災待哺之民兩有裨益所借銀兩若盡由糧賦攤征歸還爲數較多民力恐有未逮臣與司道再四籌酌應請以五千兩歸於該縣民糧分作十年勻攤帶征還欸俟正賦二年帶



征完竣再于道光十四年起征此項每年所征不過五百兩既順輿情亦不至重累于民其餘四千兩由臣與司道及別府廳州縣酌量捐廉分作五年扣還歸欸再此項要工需員查辦前委辦賑之署正安州知州煇署綏陽縣陳鏊俱諳鍊工程辦事實心該州縣皆距桐梓百里之程可以朝發夕至應令該二員會同署桐梓縣王鎮疆隨時查催俾不致牽延浮冒以昭核實所有借動庫項開河洩水緣由理合會同雲貴總督臣阮恭摺具奏道光十一年九月二十一日奏十月十三日奉

上諭嵩溥奏勘明開河洩水請借動庫項一摺貴州桐梓縣本年夏間被水成災該處僅有小河分注崖洞是以積水難消據該撫勘明戴家溝地方山勢尚低可以開河一道藉資宣洩所需公費等銀一萬一千餘兩除該管道府縣等現已捐銀二千兩外著照所請准其在於司庫報部公費項下借支銀九千兩發交遵義府督同桐梓縣趕緊辦理所借銀兩其五千兩著歸於該縣民糧分作十年勻攤帶征還欸俟正賦二年帶征完竣再於道光十四年起征其餘四千兩由該撫等酌量捐廉著分作五年扣還歸欸此項要工需員查辦據奏署正

通志卷之四十一  
安州柏中燧署綏陽縣陳鏊俱尙諳悉工程著准其卽  
令該二員會同署桐梓縣王鎮疆認真查催毋許牽延  
浮冒以昭核實該部知道欽此

署知府張光郢請展開河限期稟七月二十一日  
接奉憲臺會同臬憲札開桐梓縣等具稟開挖戴  
家溝河道再請展限六月底一律完工迄今七月  
未據具報完竣飭卽飭桐梓縣並委員等將開挖  
河成工竣緣由詳報等因奉此卑府遵於二十三  
日在郡起程行抵板橋途次據桐梓縣河工石匠  
頭王正棋陳起慶等紛紛以急工捨命催比難堪

各情詞攔輿投遞前來隨即逐加查訊據王正棋等供稱伊等係綦江湄潭遵義各處石匠頭去歲九月桐梓縣開挖蒙縣主招來承辦河工係按段議價勒定限期均在桐梓縣案下各具承領工價及依限完竣各結在卷初限年底告竣因河道高低不一且係連山巨石不能一律開通明河改爲明暗相間工程阻滯復請展限今歲三月告竣又因明河俱係青石堅硬每日每工僅能錘鑿一二寸暗洞內多係白石固錘鑿較易但洞內窄逼不能多人夫雖經差役之儘日催呼復經縣主之

五日一比至三月間工程僅及十分之六七復請展限至六月底完竣因思一展再展以後豈容仍請展限遂於四月內分爲晝夜輪班片刻不停原計依限可以告竣詎至入夏後陰雨過多洞內積水必須連番車戽又兼初開暗洞二三丈俱係白石漸進則帶紅石亦間有青石且洞內潮濕氣重工匠受病計自五月半後工次石匠二百餘人在工患病延醫調治者九十餘人蒙縣主發給醫藥之費已陸續領過錢二百餘千文因病重發回醫治者二十餘人又在工病斃者十二人均蒙縣主

賞給棺木六月後求縣主暫停夜工因工程緊要  
仍五日一次比較分別笞杖伊等係承辦石匠頭  
至今已逾六月尚未告竣誤限受比者咎無可辭  
但工程實有窒碍之勢並非匠等敢於疲玩貽誤  
若再加嚴比伊等石匠頭有承辦之責固不敢惜  
命逃亡無奈各段散匠視洞工爲畏途萬一紛紛  
逃竄伊等石匠頭雖萬死亦難告竣等語卑府詰  
以桐梓河工究竟能成與否據稱應開明河暗洞  
除明河業已全數開通外僅有暗洞五十二丈六  
尺尙未完竣如緩以時日不能全數開通情願出

具到首甘結詰以暗洞因何不能多用人工每日  
可開挖若干約計何時可以告竣據稱暗洞高寬  
均只五尺僅用中間一人執鑿左右二人打鎚如  
不遇青石每日可挖深八九寸兩頭開挖每日可  
得一尺七八寸現在未通暗洞四段每日可挖七  
尺一二寸再加七十日定可告竣卑府當諭以此  
係奏辦工程地方官有督辦之責一經違悞卽干  
參處爾等工匠有承辦之責屢次逾限豈能不受  
比責茲復嘵嘵具稟仍請展限大憲豈能俯如所  
准該石匠等伏地涕零惟懇查勘艱鉅情形並垂

憐捨命苦工隨於二十四日馳赴桐梓縣勘得城  
外有官渡河一道右發源於離城三十里之楚米  
鋪左發源於離城十五里之黑石溪此外如楊村  
溝楊家河南溪河皆以官渡河爲壑由官渡河匯  
流而至離城十里爲方家洞再二里而分兩叉右  
爲葫蘆洞暗流消水俗所稱消水洞是也左爲周  
家洞洞口穿山而過爲大馬總名馬江埧距城十  
五里水至此而四山環峙並無出路向來惟賴方  
家各洞以資銷納故無逆流之患自乾隆初年方  
家洞淤塞惟葫蘆洞尙能消瀉秋冬水涸固無泛



濫之虞若春夏水漲則官渡河兩岸之田園廬舍自嘉慶十三年後幾無歲不被水淹沒而惟去歲水灌城內署中監倉淹至一月有餘實爲從來未有之災總由於官渡河之水有來路而無去路也茲於馬江埧左之戴家溝開挖河道直達壽國山外之水坎河匯流而過仁懷縣至合江縣而歸川江自馬江埧至水坎河計長三百九十餘丈初擬一律開通明河因中有重岡疊阜阻隔難以開挖改爲明暗相間分作三十段該石匠頭等按段議價承領包辦除應開明河一百七十四丈業已全

數開通外應開暗洞二百二十三丈第十四段至  
十六段計長二十五丈已開進十二丈五尺未開  
通十二丈五尺第二十段至二十四段計長三十  
丈已開進二十四丈未開通六丈第二十五段至  
三十段計長四十丈已開進二十五丈九尺未開  
通十四丈一尺惟第九段至十二段計長二十五  
丈先已開挖暗洞五丈後均係青石堅硬錘鑿難  
施改開明河二十丈現已開挖及半卑府查看情  
形明河之工易於暗洞但中有重岡疊阜高至十  
七八丈或至二十一二丈不等若一律開通明河

經費非三萬餘金斷難足數且左右上下俱係民田所挖土石亦無處堆放自不得不改爲明暗相間暗洞之工不能多用人夫經費固有而人力難以施展且洞內潮濕氣重工匠必至受病該石匠頭等稟稱病斃十二人查驗工簿確有姓名住址月日可據發給醫藥錢文多至二百三十四千定見該工匠等患病之多因受雇營工而至喪命情殊可憫且各棚工匠疾痛呻吟之聲耳不忍聞各洞人夫塗手沾足之形目不忍觀若再加督責該石匠等均係遠方人民招集匪易萬一紛紛逃竄

勢必停止工作另行招集轉致稽遲時日急行無  
善步促柱少和聲固理勢所必然況此次工程總  
在功之克底於成若河道終不能開通不獨民間  
之田園廬舍所關匪細卽桐梓縣之城池監倉亦  
深爲可慮自去歲興工以來至今已用過經費銀  
一萬二千餘兩如果工程歸於烏有水患不能永  
消卽將承辦工匠盡法處治并將督辦各官嚴行  
參辦誠無足惜據現在工程業已功歸有濟費不  
虛糜一邑之城池可保百萬之生靈可救前此數  
十年之積患可除後此數百年之利賴方長一勞

永逸功在斯時茲因工程窒碍以致遲誤限期既非工匠之任意遲延亦非各官之督催不力似宜量加垂諒再寬限期卑府通盤計算工程並始終核計經費未開五十二丈之暗洞夜工必須停止以示體恤而泯怨咨秋後晴霽日多工無阻滯九月底必能告竣明河暗洞一律開通之後必須一律修整完全亦須一月之工且因周家洞距馬江垠中有阻隔周家洞高而葫蘆洞低固一望而易見周家洞口穿山而過馬江垠之高於周家洞若干尺數竊難憑臆而斷水勢就下必待葫蘆洞水

溫然後歸入周家洞則周家洞口之前必須再挖  
深五六尺洞後之馬江埧設使尙高於周家洞或  
一二尺或尺餘又必須將已開通之明河暗洞一  
律開平水勢方能順流而疏暢趕緊辦理總以年  
終爲率所有經費除原奏一萬一千兩及于故守  
稟攤二千四百兩僅足開挖明河暗洞之費如再  
行修整并挖深周家洞之費若干此時尙難估計  
卑府自當及時籌畫決不使經費有缺功敗垂成  
上厯慈懷卑府甫經到任無所用其廻護謹將河  
工實在窒碍情形並謬參管見縷悉具稟道光十

二年八月

十四年桐梓開河工竣巡撫裕泰請免攤征還帑錢糧另行籌捐歸欵

貴州巡撫裕泰奏報桐梓河工竣事請免攤征歸欵錢糧摺奏爲開河工竣請將原借欵項捐廉歸還邀免攤征以紓民力而示體恤恭摺奏祈

聖鑒事竊照前撫臣嵩溥具奏桐梓縣開河洩水懇請借動庫項以資工費分別捐廉攤征歸欵一摺道光十一年十月三十日奉

上諭嵩溥奏勘明開河洩水請借動庫項一摺貴州桐梓

縣本年夏間被水成災該處僅有小河分注崖洞是以積水難消據該撫勘明戴家溝地方山勢尙低可以開河一道藉資宣洩所需公費等銀一萬一千餘兩除該管道府縣等現已捐銀二千兩外著照所請准其在于司庫報部公費項下借支銀九千兩發交遵義府督同桐梓縣趕緊辦理所借銀兩其五千兩着歸於該縣民糧分作十年勻攤帶征還欸俟正賦二年帶征完竣再於道光十四年起征其餘四千兩由該撫等酌量捐廉着分作五年扣還歸欸此項要工需員查辦據奏署正安州柏中燧署桐梓縣陳鏊俱尙諳悉工程着准其卽



令該二員會同署桐梓縣王鎮疆認真查催毋許牽延  
浮冒以昭核實該部知道欽此當經前撫臣督飭委辦  
認真查催嗣據遵義府桐梓縣具報于道光十一  
年九月二十一日開工挑挖數尺之下俱係連山  
巨石必須添僱石工加力錘鑿平坦之處開作明  
河尙易爲力至於高峻之處須由石中穿鑿而過  
施工實難兼之偶遇大雨水從石隙流出亦須尋  
去其水方可開鑿原估經費實屬不敷且不能依  
限迅速完工由該府州縣等續捐銀兩應用並請  
展限屢經前撫臣嵩飭催趕辦在案臣到任後又

復節次嚴催旋據遵義府桐梓縣等稟報此項河  
工已於十四年三月內一律開通因中間寬窄高  
低處所尚須再加修整八月間全行開鑿深平足  
資宣洩惟馬鞍山暗洞之後本有天然石塘一道  
因由前洞鑿通石塘常有積水等情臣以該處明  
河暗洞是否深通其馬鞍山鑿通石塘之處既稱  
常有積水可否不致倒灌均須逐一勘明不容草  
率當卽飭委署鎮遠府知府張光郅會同署遵義  
府知府劉紹珪馳往詳細查勘據稟率同首士紳  
耆人等周歷查勘得所開明河暗洞共計三十段

量長五百八十餘丈暗洞寬五尺高六尺明河寬一丈低處深五六尺至丈餘高處深三四丈至十三丈不等均已一律開通並無阻隔馬鞍山暗洞因鑿通石塘雖平時常有積水而水性順下卽遇大雨時行山水迸注隨硿下流可期疏暢不致有倒灌之虞訊之彼處居民亦僉稱順流無滯此項工程共用銀二萬二千八百餘兩內借動庫款銀九千兩貴西道遵義等府州縣捐銀一萬二千七百兩紳士捐銀一千一百餘兩均係工歸實用並無浮冒由司道查核議詳請奏前來臣查桐梓縣

河工業經委員逐一勘明所開明河暗洞俱已一律深通自可無虞水患雖工竣遲至兩年有餘實因原估僅只挑挖之工迨後穿山鑿石添用石工以致限期久逾遲延尙屬有因應請免其置議所需經費銀兩除官員紳士捐辦外尙有借動庫欸銀九千兩內四千兩原議自道光十一年冬季起至十六年秋季止在于臣與司道府廳州縣養廉內扣還歸欸其餘五千兩係紳耆等稟懇攤征歸于該縣民糧分作十年攤征還欸應于十四年起征惟查桐梓縣地方山多田少地瘠民貧每歲闔

邑應納錢糧僅止二千餘兩且多零星小戶自十一年被水後閭閻生計未能寬裕開挖河道因係預防水患保衛民田起見究非興修水利可比若干民糧內每年攤征銀五百兩雖出自紳耆等情愿爲數亦屬無多而察看現在情形民力不無拮据似非仰體

聖主子惠黎元至意臣與司道等悉心籌酌與其攤征糧賦有累小民莫如仍行捐廉歸還則眾擎易舉轉較爲妥便合無仰懇

天恩俯念民力未紓准予桐梓縣民糧內免其攤征銀兩

以示體恤並請俟借款四千兩扣清後將此五千兩亦在於臣與司道府廳州縣養廉內自十六年冬季起分作五年接扣還款至該縣紳士捐資襄辦出力由臣分別獎賞外其道府州縣各員雖經捐有銀兩共成善舉但係地方應出力辦之事亦不敢仰邀議敘此案工程係官民捐辦並於養廉內扣還借款并未動用正項請免造冊報銷除飭取承修委勘印結並繪具圖說另行咨部外所有開河工竣並酌議捐廉歸還借款請免攤征緣由理合會同協辦大學士雲貴總督臣阮元恭摺具

奏伏乞

皇上聖鑒訓示謹奏

十八年十月仁懷縣小溪里民穆繼賢謝法真等聚衆作亂十二月雲貴總督伊里布貴州提督余步雲貴州布政使慶祿等討平之

先是十七年冬仁懷民謝氏女聘穆氏子未歸忽中鬼走趙氏自稱觀音佛祖趙氏神之爲製匾歸穆穆氏一家皆若有所憑哀孝飲於穆其家亦如之孝女婿穆繼賢拜春於袁家又如之男婦悉然柱香口之恭繼賢家習拳棒各有稱號繼賢號困

山大王餘人如黑神靈官川主包爺之屬十八年  
六月里長白之縣收繼賢等監禁尋獄吏以諸人  
病痰無他請署知縣王鼎彝信釋之九月五日也  
九日繼賢至家揚言將謀反願從者截辮髮爲識  
縣民趙應松招嚴村溝大垠九嶺岡馬村匪徒約  
千人應之行劫仁懷綦江之間復仇殺趙應彩掠  
其村尤酷二十六日仁懷知縣王鼎彝綦江知縣  
毛輝鳳綦江千總章泗明會捕繼賢等於鍊匠垠  
焚其居繼賢突火出拒殺千總中傷死兵死者數  
人捕者各鳥獸散繼賢乃邀謝法真等挾其黨塗



面肆掠仁桐之間大擾村豪里蠹游手不根之徒思起應之城門晝閉死徙載道十月初六日掠張二村七日掠柑子坪九日焚掠溫水時署知縣王鼎彝方同兵弁駐溫水不虞其至士眾幾無措賊亦疑有備恒懼乃勉出呼逐斃賊二人乃引去走方家溝於是推謝法真爲首逐穆元魁之家而據其室元魁故足穀且地僻險冀可負嵎延殘喘耳是日知府平翰偵知劫掠事狀上憲會副將福謙都司張文貴抄桐梓道挾兵糧兼程進移會仁懷營都司劉振彪就近堵禦飭各州縣擇隘防守賊

守備張萬清兵至二十二日提督余步雲布政使  
慶祿率兵進次方家溝俯賊巢而軍溝北十里之  
大凹箐二十五里之灰箐崇垣溝南五里之雞婆  
扁南左十五里之丁角凹右五里之小溪溝三十  
里之雙龍場又左三十里之官店又右六十里之  
放牛坪西四十里之牛渡灘十里之羊子場溝東  
三里之粉青坳十五里之白兒垣東右二十里之  
張楊垣三十里之火眼孔二十里之九垣左三十  
里之張耳村六十里之鍊匠垣溝西多荒山叢箐  
罕居民六十里之良村左之土濠山路之大水楊

周垣天星橋可出梁村者悉增官兵民勇防守二十五日赤畢營守備鄒必達兵至二十九日安義鎮總兵官阿精阿都司施應貴兵至十二月初三日雲貴總督伊里布奏請親往督剿率威寧鎮遊擊李萬忱守備劉天元水城營把總殷登朝龍應春以兵至先咨會四川總督蘇廷玉飭重慶鎮總兵官以兵協剿霧雨數日相持未下初七日合兵進攻一晝夜焚其巢殺賊二百餘人我軍死者僅撫標左營外委張錦彪武舉候補千總陳安邦及兵丁數人盡擒首逆穆繼賢謝法真等置之法初

八月賊平雲貴總督伊里布以捷

聞復搜餘黨得桐梓縣蕘龍山僧道恩與賊通謀假萬人緣聚黨將會掠人馬邊合夷匪爲亂以官兵集未敢動予棄市餘黨悉平招安流移復業從官陞敘降調有差軍需首尾用銀核減爲五萬一千兩以未經三月歲事不敢糜帑由本省官捐籌還庫十月二十八日貴州巡撫賀長齡會同雲貴總督伊里布貴州提督余布雲奏爲遵義府屬之仁懷縣與川省綦江縣交界地方匪徒聚眾焚掠滋事拒殺汛弁兵民由省派員帶兵往勦並臣步雲藩

司慶祿隨後親往督辦以冀迅靖地方恭摺奏祈  
聖鑒事竊臣長齡於本年十月十三日戌刻十四日辰刻  
連接遵義府文武各員稟報該府仁懷縣接壤川  
省綦江縣之小溪里有民人穆繼賢與武生趙應  
彩因仇涉訟經縣訊結穆繼賢更挾訟仇將趙應  
彩殺斃趙姓疊赴仁懷綦江兩縣報案差拿緊急  
穆繼賢卽糾集本地與川省匪徒數百人割取趙  
應彩首級暨桿洩忿乘勢恣搶並糾合該處之謝  
姓瘋女及素能醫病之袁明倫妄稱能知禍福煽  
惑鄉愚欲俟糾集人多赴川劫掠仁懷縣知縣王

鼎彝聞信往拿綦江縣知縣毛輝鳳及該汛外委  
章泗明亦來查辦王鼎彝與毛輝鳳於十月初三  
日督率兵役鄉勇圍打賊寨殺斃賊匪趙應松一  
名拿獲李永遠等十名詎該匪數百人突出肆殺  
鄉勇未練官兵又少致被賊匪戮斃十數人外委  
章泗明倉猝遇害該匪遂於附近村莊劫搶襲脅  
漸聚漸多該處距遵義府城六百餘里該守平翰  
該協福謙及該營都司張文貴於初九日得信卽  
帶兵三百五十名由小路馳往並飭毗連各州縣  
團練鄉勇擇要防堵署仁懷營都司劉振彪帶兵

一百名就近堵禦貴西道周廷授亦馳往督辦貴陽省城距賊匪滋事之處七百餘里臣賀長齡一經得信恐該處兵單漸致蔓延卽商同司道挑派省標兵五百名酌委署貴陽府事准陞平越直隸州知州石煦署臣標中軍事提標中軍參將李鳳和星夜帶往迅速圍拿毋任漏網又添派尚未交卸之銅仁府知府周作楫就近馳往協力督勦一面繕發告示委員實往曉諭居民安堵無恐並諭賊黨准其自首免罪有能捉賊來獻一體給賞能獲賊首卽爲奏請

加恩使之自相猜疑及早解散臣步雲正將交卸適得此  
信並聞署提督鎮遠鎮榮玉材將次抵省卽帶印  
信至省城與臣長齡商辦以賊匪無多遵義仁懷  
各營及由省派往之兵足敷勦辦現有道府副參  
數員督率臣步雲暫可毋庸前往當卽會札嚴催  
務早蒞事臣伊里布接據稟報又經檄飭貴西道  
周廷授及帶兵文武各員弁妥速馳捕以靖地方  
旋據該守平翰稟稱仁懷縣知縣王鼎彝於初九  
日在溫水汛帶領鄉勇督同防汛弁兵鎗斃賊匪  
趙應山袁國方二名並賊黨十五人又拿獲竄出



賊匪謝世昌謝世維羅學銀袁啓祥李二等五名  
又於十六十七等日續獲賊匪二十餘人該守平  
翰又拿獲謝世舉謝世彩楊升穆先貴等四名據  
供現在滋事匪徒有十箇頭目內趙應山一名眾  
人都聽他的話稱他做趙元帥已被官兵殺死趙  
應松袁國方亦係頭目並經鎗斃還有袁明倫卽  
袁國方之姪稱爲袁天岡穆繼賢稱爲困山大王  
謝姓瘋女稱爲干手觀音現獲之謝世舉謝世彩  
卽其叔父其餘記不清楚伊等皆是被脅人夥乘  
空逃出等語該守恐有奸細不敢畱於軍前所稱

被脅入夥殊難憑信委員將各犯並前獲之李永遠等解省審辦又據桐梓縣知縣敖右賢稟稱於縣境防堵拿獲川省賊匪張泮汪庭萬二名又據署仁懷廳同知馮紹彭稟報拿獲探信賊匪林貴懷一名一併解省審辦並將鎗斃之趙應山趙應松袁國方卽在該處割首梟示以寒賊膽賊聞官兵漸集屯據方家溝負險自固各處居民並經該府縣逐路安撫尙無驚擾惟賊匪頭目已有十人恐其夥黨亦不止於數百並敢妄稱大元帥等名目尤屬叛逆顯然所供鎗斃之處實難憑信亟

應速行勦捕立正典刑臣步雲尚未交卸卽偕藩司慶祿帶同署永安協王志元署提標右營遊擊慶德挑派兵丁六百名星夜馳往督辦以冀剋期剪除無使滋蔓此特一隅中之一隅通省大局安堵如常可紓

聖廑署提督榮玉材卽前赴安順借用中軍關防辦理日行事件藩司衙門事務卽委臬司李象鵬暫行代辦所有仁懷縣匪徒滋事先後帶兵勦辦緣由臣等謹合詞恭摺具奏伏祈

皇上聖鑒訓示謹奏十二月初一日軍機大臣奉

上諭本日據伊里布等奏貴州遵義府屬之仁懷縣與川  
省接壤有民人穆繼賢與武生趙應彩因仇涉訟將趙  
應彩殺斃糾集匪徒數百人乘勢恣搶並糾合謝姓瘋  
女及素能醫病之袁明倫妄稱能知禍福煽惑鄉愚經  
仁懷縣知縣王鼎彝綦江縣知縣毛輝鳳督率兵役鄉  
勇殺斃賊匪趙應彩一名拏獲李永遠等十名外委章  
泗明及兵勇十餘名猝被戕害現在挑派省標兵五百  
名飭委署貴陽府事石煦及尙未交卸之銅仁府知府  
周作楫等馳往協力督勦提督余步雲尙未交卸及偕  
藩司慶祿帶同署永安協王志元等星夜前往督辦等

語該匪徒等胆敢聚眾滋事設立名號拒傷官兵實屬不法亟應痛加勦辦以靖地方惟烏合之眾糾集未久不難卽時撲滅着伊里布等卽委派文武員弁趕緊趁勢勦辦毋任滋蔓裏脅至所獲匪徒供稱有頭目十名如袁天岡卽袁明倫困山大王卽穆繼賢千手觀音卽謝姓瘋女均須按名弋獲毋任漏網其已拏獲之謝世舉謝世彩楊升穆先貴等是否在此十名之外抑逃竄人數尙夥均須根究明確不得任其蒙蔽狡卸所有趙應山趙應松袁國方三名頭目雖據該犯等供稱已經殺斃難保非藉詞朦混亦應質訊確切先後拏獲各犯

著卽分別就地正法以昭炯戒該匪徒等如果有訊出  
被脅入夥之人旣肯自首該督撫等自應酌量情節免  
罪卽有捉獲賊首來獻者亦係該匪徒勢窮力竭反誣  
倖生此等無賴奸徒至寬亦不過貸其一死該督等奏  
稱籲請加恩之處斷不可行仁懷縣毗連川省匪徒易  
於逃竄著伊里布等一面咨會川省認真防堵一面分  
路搜拏勦除淨盡毋使稍畱餘孽以肅邊徼而靖閭閻  
將此各諭令知之欽此十二月二十四日軍機大臣奉  
上諭本日據伊里布奏貴州仁懷縣匪徒穆繼賢等糾眾  
滋事據險抗拒現在進攻未能得手查核情形非厚集

兵力不能尅期剪滅已調提標及威寧定廣永安平遠  
長寨畢赤等標兵二千二百餘名分往協勦並帶同安  
義鎮總兵阿精阿前往現經該提督與司道等分路進  
攻該處四面皆山形勢險峻山口路狹人難連騎又被  
該匪壘石樹柵將路截斷我兵鎗砲兼施殺斃數十人  
我兵亦陣亡外委一員兵丁數名賊巢牆垣高厚並用  
大木夾立欄柵蒙以牛皮堅固異常一時不能摧破等  
語此等公磨小醜眾皆烏合乃敢傷及官兵負隅抗拒  
亟應厚集兵力聚而殲旃該督等惟當催令未到各兵  
趕緊馳往與提督及司道各員弁等體察情形分路攻

勦務使掃穴擒渠迅速藏事不得令該匪徒等聞風逃竄致滋蔓延雖據奏稱並未勾串苗民仍著加意巡防毋令乘間裹脅又另片奏請將署仁懷縣知縣王鼎彝革職審訊等語穆繼賢袁明倫二犯因事拏獲到案到案之後又何以復行出外滋事現已明降諭旨將王鼎彝革職審訊矣著該督等卽提原卷確切根究據實具奏毋任飾詞狡展致有不實不盡將此各諭令知之欽此

十一月十一日署四川總督蘇廷玉奏貴州仁懷縣匪徒妖言惑眾焚搶滋事拒捕戕官臣現飭重



重慶府馳往交界地方督兵防堵擒獲竄匪多名  
地方安靜恭摺奏

聞仰祈

聖鑒事竊臣於本年十月初五初九等日接據重慶鎮張  
作功重慶府汪日宣等稟報九月二十二日貴州  
仁懷縣屬鉄匠垠居住學習拳棒之穆繼賢等妖  
言煽惑聚集二百餘人焚掠鄉村川省綦江江津  
等縣與仁懷連界綦江縣毛輝鳳汛弁外委章泗  
明帶領兵勇前往交界處所防捕經仁懷縣知縣  
王鼎彝相約帶拿該匪羣聚磚房恃眾出拒當被

兵勇殺死逆匪數名生擒穆廷沅號慈航道人穆  
奇映號雪山和尚因眾寡不敵外委章泗明致被  
戕害兵勇亦有傷亡該匪復燒劫仁懷縣屬之溫  
水場張耳村柑子田一帶場市該鎮府已於初三  
初六等日酌帶官兵數百名親赴堵禦等情臣以  
該匪等滋事之區雖隸黔省而川省綦江等縣既  
與接壤誠恐攔入爲害節經飛飭張作功等分駐  
要隘嚴密巡防並飭與仁懷毗連之敘永合江等  
廳縣一律防禦一面專弁星飛知會貴州巡撫迅  
速派兵勦捕旋據張作功等稟稱綦江江津兩縣

凡與仁懷接壤之處均已派撥弁兵會同地方文員布置周密該鎮與汪日宣駐札適中之地左右策應黔省遵義府文武亦帶兵至彼查辦該匪卽委棄磚房竄聚溫水場對面山溝離綦境愈遠又據文武員弁先後報獲匪犯余仕受等二十餘名并在余仕受身上搜獲木印一顆上刻驅法靈印四字并五雷令牌等物提訊余仕受供稱仁懷苦草坪人穆繼賢等因降神惑眾邀伊入夥伊糾集男婦一百餘人同往起事穆繼賢封伊爲統兵大元帥給與印牌穆繼賢自稱困山大王餘匪各有

先鋒元帥觀音等項名號穆家使女稱爲黎山老  
母已被團眾鎗斃伊卽該使女之大徒弟楊大苗  
種供係仁懷縣小水人羅庭瓏母庭鰲周有周庭  
舉余茂芳等供係仁懷縣人穆攀桂供係仁懷縣  
土圯口人余洪桂余世倌供係仁懷縣大土岡人  
穆林俸供係仁懷縣芭蕉寮人穆玉贊供穆繼賢  
與同夥袁天剛本年夏間已被仁懷縣拿獲收卡  
查係瘋疾釋放余安庭穆奇寬穆玉柏王應發母  
元珍母寶寅何洪發羅鳴聲余茂春趙應年趙幗  
位黃正萬陳洪順與楊大苗種等俱供稱或係事

前被逼入夥或由隨時裹脅勉從各等語臣批飭  
解交重慶府汪日宣彙訊畫一供詞稟呈核辦嗣  
知遵義府文武僉以鍊匠垠爲川黔交界之所臣  
復札行張作功等會同遵義府平翰等確切查勘  
究竟是川是黔以招核實接據平翰稟稱已查明  
鍊匠垠實係仁懷縣境內并抄送已獲夥犯謝老  
七卽謝士舉供單內稱伊係仁懷縣人因本處鍊  
匠垠有穆繼賢趙應山等聚眾搶掠等語覆查穆  
繼賢等以鄉曲小民胆敢降神惑眾各立山王等  
項荒誕不經名號焚掠村庄戕害兵弁實屬罪不

容誅雖起事之鋏匪垣及擾害地方皆在仁懷界內并未竄入川境惟旣壤地相連自應不分畛域協同捕滅現在該匪等遁入山溝之後未聞肆出擾掠貴州官兵前至勦捕自不難一鼓蕩平臣現復諄飭張作功等實力分守要隘遙爲聲援如黔兵進勦之時協力擒捕務將逃竄匪徒悉數捕獲并嚴查如有川省民人被獲入夥亦卽妥密掩拿勿使一犯漏網一俟事竣卽將所獲各犯押解貴州省歸案審辦現在川省邊境居民安堵如常所有貴州仁懷縣匪徒滋事臣現飭鎮府督兵防堵

緣由理合恭摺具奏伏祈

皇上聖鑒訓示謹奏

十二月十二日雲貴總督伊里布等奏爲官軍連夜扑破賊巢殲斃賊眾並生獲首逆及要犯多名地方業已肅清先行由驛馳奏仰慰

聖懷事竊貴州仁懷縣逆匪聚眾滋事臣賀長齡督同代辦藩司李象鵬在省籌撥糧餉臣余步雲與藩司慶祿先抵軍前於十一月二十二日率兵進攻因賊匪據險抗拒尙未得手臣伊里布在遵義縣途次接准函報當卽專弁恭摺具奏一面親率所調

威鎮官兵四百名於十二月初三日馳抵方家溝  
軍營先是臣余步雲與藩司慶祿因續調各兵一  
時未能盡到就近函商署四川督臣蘇廷玉飭令  
重慶鎮總兵張作功帶領防堵官兵三百餘員名  
過黔協勦連日霧雨甚眾未便進擊臣伊里布親  
閱賊巢見其牆柵堅固異常又復時在牆隙及地  
道中暗行施放鎗炮兵近輒傷破之殊非易易因  
與臣余步雲及藩司等籌商添置鍊裹攔牌及土  
囊柴草一切火攻器具初七日天色稍霽隨令提  
標及威鎮定廣賈陽畢赤等協營將弁督兵攻賊



之前撫標及大定長寨遵義仁懷等協營將弁攻賊之後左手令重慶鎮張作功會攻右手令安義鎮阿精阿協催臣余步雲在前敵藩司次之臣伊里布又次之憑高督戰是日辰刻各營出隊齊進賊匪望見我兵竟敢鳴鑼擊鼓突出數百人直前迎拒我兵奮勇扑攻鎗斃紅衣賊目一人都司施應貴亦鎗斃二人賊眾畏懼稍退我兵乘勢進攻該匪抵死抗拒自辰至酉殺斃賊匪二百餘人我兵亦有傷亡其妄稱大元帥之趙應松與其子趙坤運仍敢恃強突出直犯我兵守備周開憲千總

聶炎鼓勇迎擊當經聶發將趙應松父子砍死割  
獲首級各匪奪氣不敢復出臣伊里布臣余步雲  
與藩司督催官兵四面如牆而進參將王志元李  
鳳和都司李萬忱守備周開憲副將福謙等奮不  
顧身帶領奮勇弁兵繞逼賊巢從右首馬房拋擲  
柴草火彈登時燃著正樓延及廂房及旁後各房  
總兵張作功率領重慶弁兵同時逼攏與各路官  
兵拔柵挨牆層層圍攻該匪屢欲外竄均經臣余  
步雲督率都司慶德把總羅亨祿等不避矢石鎗  
砲並施擊斃賊匪甚眾頭目穆三王亦爲慶德擊

斃維時已交夜半風順火烈賊巢房屋接連焚燬  
燒斃壓斃之賊不計其數墜牆投池及自行縊斃  
者亦不下二三百人迨五更時分各匪六七十人  
暗由水溝潛遁當爲我兵所覺分頭撲捉經定廣  
協兵丁楊學清楊連升暨鄉團陳世昌等將穆繼  
賢謝士倫拏獲外委石昆暨兵丁張源瑞等將余  
夢贊拏獲千總韋成喜暨鄉團陳世昌將穆先倖  
拏獲並共獲夥匪三十餘名其竄至謝家埧之謝  
法真趙應山趙應周等亦經貴西道周廷授督飭  
自募鄉勇當夜拏獲並於謝法真身邊搜出逆書

我兵見首逆就擒勇氣百倍其時已交初八日卯刻各弁兵翻牆直入又獲男婦百餘人將賊巢全行折毀李鳳和周開憲羅亨祿等復帶兵勇四出搜捕周開憲督同仁懷縣團練及馬兵鄭大洪將逃竄之匪犯穆孝袁明倫等先後捉獲千總孟國先外委彭俊元亦將穆繼朋拏獲眾兵又將謝富英侯隴拏獲不辨誰先下手合計殺獲首夥各犯約及千名臣等恐尚有竄逸現又選將派兵分投搜拏以期一無漏網並將前調之提標及永安平遠兩協官兵一千二百名飛札截回現在各兵除

畱派搜捕外亦分起凱撤以節糜費被擄婦孩示  
招屬領幼孩無歸者令士民領養一面將被擾地  
方妥爲安撫並招諭搬避各良民速回復業俾免  
流離至此案竊孫謝法真爲首該犯假托降神且僞  
造天書聚眾謀逆僞封各縣犯爲大王軍師天師  
丞相元帥及靈官黑神觀音佛祖等名號其穆繼  
賢先爲困山大王嗣後僞封川主統領眾目將穆  
繼朋僞封困山大王又頭目趙應松趙應山甫於  
此次砍斃擒獲從前鎗斃之犯並非該犯等正身  
均應分別更正臣伊里布現在督飭司道委員等

提犯研鞫據謝法真供認爲首稱一時糊塗爲降  
神所迷糾眾起事查閱書詞亦甚狂悖俟訊定各  
供卽在軍前將情重各犯先行正法以彰

國憲而快人心再將穆繼賢袁明倫獲案訊釋出卽滋  
事之署仁懷縣知縣王鼎彝並失察各文武及十  
月二十九日被賊搶去火器藥鉛之領兵各員一  
併查明核實分別參辦以示懲儆並將各犯供詞  
繕單恭呈

御覽至此次各官兵歷時一晝夜之久在水田泥淖中踴  
躍用命摧破賊巢將首夥各犯殺獲殆盡實屬不

遺餘力其餘文員或督辦糧運或趕製攻具在在  
應手亦均奮勉之至可否將在事川黔兩省大小  
員弁兵丁擇其尤爲出力者酌量保奏並將陣亡  
各弁兵給與

賜恤之處出自

皇上天恩除將未盡各事宜再行熟籌妥辦外所有勦滅  
逆匪生擒首要各犯緣由謹先合詞恭摺馳奏伏  
祈

皇上聖鑒訓示謹奏十二月二十八日內閣奉

上諭本日據伊里布等由四百里馳奏官軍攻破賊巢並

殲擒首逆各要犯一摺所辦甚爲妥速可嘉之至此案  
貴州匪徒謝法真假托降神捏造天書聚眾謀逆僞封  
名號穆繼賢先爲因山大王嗣封川主統領眾目抗拒  
官兵經伊里布等揀調兵弁親往督勦該逆等仍敢恃  
險負隅突出迎敵並於地道中暗行施放鎗砲傷我兵  
丁余步雲及藩司慶祿等籌添鐵裹攔牌及土囊柴草  
一切火攻器具統率兵弁四面協攻竭一晝夜之力殺  
斃賊匪二百餘人並焚燬賊巢燒斃壓斃之賊不計其  
數墜墻投池及自行縊斃者亦不下二三百人復經各  
員備分路扑攻四出搜捕合計殺獲首夥各犯約及千



名其逆首謝法真及穆繼賢袁明倫等均已就擒地方  
業已肅清該督等悉心籌畫督率有方俾滋事匪徒全  
數就獲不致蔓延各處糜餉勞師自應特沛恩施以示  
嘉獎伊里布着賞戴雙眼花翎仍交部從優議敘並賞  
給玉搬指一個玉翎管一個雙眼花翎一枝黃辮大荷  
包一對小荷包四個玉鼻烟壺一個余步雲着賞加太  
子太保銜仍交部從優議敘並賞給玉搬指一個玉翎  
管一個黃辮大荷包一對小荷包兩個賀長齡在省督  
辦糧餉經理得宜着交部議敘布政使慶祿着賞戴花  
翎仍交部從優議敘其川黔兩省自總兵阿精阿張作

功以下在事之大小員弁兵丁着該督擇其尤爲出力者覆實保奏候朕施恩並將現在首先擒獲首要各犯之員弁分別查明據實覆奏其陣亡各弁兵照例賜卹至署仁懷縣知縣王鼎彝前因將穆繼賢袁明倫因案拏獲復行出外滋事革職審訊仍着該督遵照前旨確切根究不得因現已蒞事稍存遷就餘着照所議辦理將此通諭中外知之欽此

十九年

二月初二日雲貴總督伊里布貴州巡撫賀長齡開單會奏勦平逆匪在事尤爲出力之文武員弁

兵丁請鼓勵陣亡官兵請

賜卹及應行參辦之文武員弁請分別治罪三月初二日

內閣奉

上諭前因伊里布等勦辦仁懷縣逆匪迅速當降旨將在  
事出力大小員弁兵丁覈實保奏茲據該督等查明開  
具奏自應量予鼓勵貴州按察司李象鵬着交部議  
賈西道周廷授着賞戴花翎並免其失察處分降調  
知府周作楫着以同知直隸州畱黔補用棟發知縣郎  
汝琳貞豐州分駐冊亨州同陸用康普安縣縣丞胡台  
普安廳照磨顧寬揚候補從九品顏逢恩均着賞戴藍

翎候補吏目田世芳候補未入流邵鴻儒吳德容均着以本班儘先補用候補知府楊春階着交部議敘松桃廳經歷婁鎔着以應陞之缺陞用安義鎮總兵阿精阿四川重慶鎮總兵張作功均着交部從優議敘定廣協副將汪鳳臨着賞戴花翎並加總兵陞銜威寧鎮右營都司慶德着賞戴花翎並著以遊擊陞用先換頂戴撫標中軍參將王志元騰越鎮右營都司施應貴均着賞戴花翎清江協右營藍翎都司李萬忱着賞換花翎該三員均着賞加陞銜先換頂戴安義鎮右營藍翎守備周開憲着賞換花翎仍以都司陞用坐補湖南千總聶

發着回湖南以守備卽行陞用免其坐補定廣協左營  
藍翎千總孟國先着以守備陞用先換頂戴四川綏寧  
協右營千總韋成善貴州安順營右哨外委彭俊元長  
寨營右司外委石崑均着賞戴藍翎仍以應陞之缺陞  
用四川重慶鎮右營以守備儘先陞用之藍翎千總虎  
嵩林着賞換花翎貴州威寧鎮右營千總李上達提標  
前營把總周昆撫標左營把總許子超安順營把總唐  
起榮督標左營把總楊潤安義鎮右營外委劉利溥均  
着賞戴藍翎周昆唐起榮着再加恩以千總卽行陞用  
先換頂戴提標左營守備彭長春外委徐廷偉均着以

應陞之缺陞用四川重慶鎮左營候補把總楊振川着以把總儘先拔補拔補後以千總陞用長寨營額外包王元黔西營額外鄧錦春着以外委儘先拔補貴陽營額外周飛熊着儘先拔補外委拔補後以把總補用兵丁鄭大洪楊學清楊連陞均着賞戴藍翎仍以委外超拔蔡文芳余永魁張國棟向承恩張維義馬中全陳朝陽均着賞戴藍翎姜兆林劉鳳鳴施嘉祥李長春漆應元均着以外委超拔王應蘭馬朝剛張申元李朝柱陳得一均着以額外外委儘先拔補練勇何洪太着賞戴藍翎並給予六品頂戴練勇陳治昌着賞給六品頂戴

其陣亡之外委章泗明張錦彪武舉陳安邦均着照陣亡例賜卹所有陣亡及受傷兵丁着該督等查明咨部辦理單併發欽此同日內閣奉

上諭伊里布等奏查明逆匪滋事案內應行參辦之文武員弁請旨分別治罪降革一摺貴州仁懷縣逆匪謝法真等聚眾滋事已革知縣王鼎彝形同驍贖毫無覺察著發往新疆効力贖罪仁懷營分防猿猴汛把總張順協防外委唐清於該汛居民糾眾謀逆不能察出實屬昏懦著一併革職發往新疆充當苦差遵義府知府平翰既失察於前迨該逆匪等起事後與遵義協副將福

謙帶兵馳往其時逆匪無多不能迅速設法撲滅殊屬  
無能著降爲知縣畱於該省補用福謙又與署撫標中  
軍參將事提標中軍參將李鳳和領兵會勦失去火器  
鉛藥福謙著併案降爲守備李鳳和著註銷預保降爲  
都司均歸部銓選准陞平越直隸州知州石煦係與李  
鳳和帶兵同往之員亦難辭咎惟究係文員著畱於該  
省以知縣降補提標前營千總鄒必達調赴軍營差遣  
不能得力著降爲外委現署仁懷營都司安順營守備  
劉振彪到任未久在營出力功過尙足相抵著免其議  
處伊里布賀長齡及藩司慶祿前署臬司糧儲道任樹



森本有失察之咎惟此次辦理迅速逆匪不至漏網著  
加恩免其議處該部知道欽此

二月二十八日貴州巡撫賀長齡奏爲川省解到  
被脅打仗夥犯與黔省畱質逆犯審明卽行正法  
餘犯按例定擬恭摺奏祈

聖鑒事竊照仁懷縣逆匪謝法真等首從各犯審擬凌遲  
斬遣因川省有已獲各匪尙未解到將袁明倫穆  
繼朋二犯暫畱候質其餘凌遲斬決各犯先行正  
法經臣與督臣伊里布會摺奏明在案茲准川省  
解到匪犯趙應權等十九名聲明侯保等十二名

訊屬無干畱川聽候核辦穆庭沅穆奇映穆林俸  
三名業於被獲時格傷身死楊大苗種等十一名  
先後在監在途病故隨行司飭委署貴陽府知府  
張志詠等提集各犯質審議擬由司詳解前來臣  
卽率同藩臬兩司提犯逐加研訊緣道光十八年  
九月間謝法真勾結穆繼賢等聚眾謀逆先後將  
趙應權穆雲年卽穆庭沅穆洪名卽穆奇映穆林  
俸黃際坤余安庭穆成連穆繼榮何洪發周幗模  
趙應年余登科卽余仕受楊大苗種余洪桂穆奇  
寬余茂春趙幗位周潮桂穆玉昌趙幗同余茂秀

李永遠等裹脅入夥十月初三日仁懷碁江兩縣會營往拿謝法真等帶同趙應權穆雲年穆洪名穆林俸黃際坤李永遠等抗拒當經官兵將穆雲年穆洪名李永遠等擒獲謝法真等旋赴各村寨燒搶趙應權被官兵箭傷左膝與謝法真等竄入方家溝余安庭穆成連穆繼榮何洪發周惲模趙應年余登科楊大苗種余洪桂穆奇寬余茂春趙惲位周潮桂穆玉昌趙惲同余茂修因被脅後不能脫身在內服役嗣趙應權等與余安庭等畏懼乘間逃出俱被拿獲穆攀桂穆玉栢穆蠻兒因與

穆繼賢同族恐受拖累羅庭隴母沅珍聞鳴聲陳  
洪順張均萬王沛華龔漸侯牛張雙隴因與謝法  
真穆繼賢住處較近慮被擄掠俱逃出躲避致兵  
勇疑係夥匪拏獲侯保母庭鰲周有周庭舉余茂  
芳余世倌穆玉贊王應發母寶寅黃正萬何紹休  
陸小五或被逼不從而竄匿或避害情急而奔逃  
亦被兵役因疑獲案臣查驗趙應權箭傷平復惟  
現訊供情與川省供詞稍有未符且川省所獲匪  
犯多係謝法真等夥黨而前次訊問袁明倫等何  
以皆稱並不認識又不將穆雲年等被擒供出恐

有避重就輕情事復向詰訊據趙應權等僉供穆雲年穆洪名實無慈航道人雪山和尚名號余登科向充道士搜獲木印令牌係道家用物並非穆繼賢付給亦無偽封統兵元帥及轉糾黨羽之事穆成連羅庭隴等在川省原供聽邀糾夥拒敵官兵焚搶場市以及打造刀矛探聽信息各情均係畏刑誣認穆姓使女委無黎山老母其人余登科亦非其徒質之袁明倫等供俱相符並稱趙應權穆雲年等如果另有不法重情伊等已問重罪何肯代爲隱瞞至前供並不認識實因穆雲年等在

川省所供名字不同又因夥黨衆多記憶不清致未將楊大苗種等姓名逐一供指並將穆雲年等就獲一層漏未供明再四究詰各供不移案無遁飾查趙應權等五犯係被脅入夥並非聽糾從逆惟曾經隨同打仗燒搶自應從重問擬除穆雲年穆洪名穆林俸黃際坤四犯已被格斃命及在監病故外趙應權應比照謀叛已行律擬斬立決案已訊明原擬凌遲之袁明倫穆繼朋無須畱質臣卽恭請

王命飭委臬司李象鵬將袁明倫穆繼朋趙應權綁赴市

曹分別凌遲斬決袁明倫穆繼朋首級解赴犯事  
地方示眾余安庭等十六犯訊止被脅服役並未  
拒敵官兵除余登科楊大苗種余洪桂穆奇寬余  
茂春趙幗位周潮桂穆玉昌趙幗同余茂秀十犯  
在監在途病故外余安庭穆成連穆繼榮何洪發  
周幗模趙應年六犯均於趙應權斬決罪上量減  
一等發新疆給官兵爲奴照例刺字羅庭隴等十  
二名與畱川省核辦之侯保等十二名訊係無干  
應各省釋除全案供詞咨部外所有質審擬辦緣  
由理合會同督臣伊里布恭摺具奏伏乞

皇上聖鑒勅部議覆施行謹奏三月二十五日奉

硃批刑部議奏欽此四月十六日刑部議奏應如所奏

理本日奉

旨依議欽此

二十年正月移遵義府經歷及遵義協右營存城千  
總駐溫水增兵戍守

吏部奏爲遵

旨議奏事文選司案呈內閣抄出協辦大學士雲貴總督  
伊里布等奏稱貴州遵義府屬仁懷縣壤地遼濶  
其所轄溫水場距縣城四百餘里烟戶輻輳又離



溫水場六十里之鐵匠垠戶口亦繁民情均極强悍上年滋事逆犯多係該兩處匪徒因附近並無文員溫水場僅設汛弁外委一員兵丁十名不足以資防範臣於勦平後察看情形擬在溫水場分駐佐雜一員遵義府經歷與府縣同城並無專管之事卽以該經歷移駐彈壓查緝宵小凡遇尋常事件准其辦理罪在杖責以上者仍令解縣審訊惟該經歷本係部選簡缺今予以分防之任事務較繁應改爲繁缺由外揀調抵任後五年無過准照苗疆佐雜俸滿之例咨部陞用至此缺旣經改

繁應將他缺改簡以符定制查安順府屬羊場塘  
巡檢一缺設自乾隆二十年原定苗疆繁缺該處  
地非邊要且近來民風淳良可以改繁爲簡歸部  
銓選與遵義府經歷互相更易庶於銓政無紊而  
邊缺可以擇人更調仍由該府考核稽查以專責  
成至溫水場原設外委職分較卑應改設千總一  
員遵義協本有存城千總兩員此外又有把總等  
弁應將右營右哨千總移住該處改歸仁懷營管  
轄其外委卽移至鐵匠垠駐札溫水場原設兵數  
太少應再添兵三十名鐵匠垠向無兵丁今駐有

外委應添駐兵十六名又自縣城至溫水場之班  
鳩井火石岡桑木坳良村四處往來大道雙龍場和  
村兩處亦屬要隘均應建立塘房撥兵駐守每處  
各駐兵四名共添駐兵二十四名統計應添兵七  
十名未便在一處裁撥應於遵義協存城兵內裁  
兵二十名仁懷營存城兵內裁兵十名又於永安  
協分駐上卦汛兵內裁兵十名落別汛兵內裁兵  
十名長寨營分駐廣順汛兵內裁兵二十名共七  
十名均撥赴溫水場等處分駐其應需衙署兵房  
除將溫水場外委公廨卽令千總居住毋庸另建

外所有經歷外委各署及班鳩井等六處塘房均應建置所需經費卽在逆產變價項下動支毋須籌款於邊要地方殊有裨益如蒙

俞允俟奉

旨後卽飭分別移駐並將各協營應移之兵遇缺擬補由溫水場等處如數招募現任千總外委二弁毋須更換其經歷及羊場塘巡檢繁簡互易現任經歷胡祖寅巡檢雷揚廷應另行酌量補用等因道光十九年十二月初二日奉

諭批該部議奏欽此欽遵抄出到部查定例大小各缺均

不得妄請更改如有實因繁簡不符必須隨時酌改之處令各督撫分別缺之大小其佐雜之缺卽以佐雜內酌改等語又查各省地方如有今昔情形不同必須移駐員弁以資巡緝彈壓准該督撫等隨時奏請酌改歷經辦理有案今該督等奏稱遵義府屬之仁懷縣所轄之溫水場距縣城四百餘里烟火輻輳又離溫水場六十里之鐵匠埧戶口亦繁民情均極强悍擬在溫水場分駐佐雜一員遵義府經歷與府縣同城並無專管之事卽以該經歷移駐彈壓查緝宵小凡遇尋常事件准其

辦理罪在杖責以上者仍令解縣審訊惟該經歷  
本係部選簡缺今予以分防之任事務較繁應改  
爲繁缺由外揀調抵任後五年無過准照苗疆佐  
雜俸滿之例咨部陞用查安順府羊場塘巡檢一  
缺原定苗疆繁缺該處地非邊要近來民風淳良  
可以改繁爲簡歸部銓選與遵義府經歷互相更  
易仍由該府考核稽查以專責成現任經歷胡祖  
寅巡檢雷揚廷應另行酌量補用等語該督等係  
爲慎重地方起見應如所請遵義府經歷准其移  
駐仁懷縣溫水場地方作爲分防要缺在外揀調

惟遵義府所屬之仁懷縣溫水場地方並非苗疆該督等請將移駐經歷照苗疆五年俸滿卽陞之處應毋庸議其原定苗疆五年俸滿卽陞之安順府羊場塘巡檢一缺旣據奏稱該處地非邊要可以改繁爲簡缺歸部銓選其現任之遵義府經歷胡祖寅羊場巡檢雷揚廷亦准其畱於該省另行酌量補用至此稱該經歷移駐彈壓查緝宵小凡遇尋常事件准其辦理罪在杖責以上仍令解縣審訊等語查遵義府經歷旣經該督奏請移駐仁懷縣溫水場地方彈壓查緝宵小凡遇尋常事件

准其辦理罪在杖責以上仍令解縣審訊應如所  
請辦理遇有應行議處職名令該督照例開參查  
該經歷既經移駐該處分防彈壓凡遇尋常事件  
准其就近辦理如罪在杖責以上各案仍歸正印  
地方官審訊以昭慎重溫水場原設外委職分較  
卑應改千總一員遵義協本有存城千總二員此  
外又有守備把總等並應將右營右哨千總移駐  
該處改歸仁懷營管轄其外委卽移至鐵匠坨駐  
札溫水場原設兵數太少應再撥兵三十名鐵匠  
坨向無兵丁今駐有外委應添駐兵十六名又自



縣城至溫水之班鳩井火石岡桑木均良村四處  
往來大道雙龍場和村兩處亦屬要隘均應建立  
塘房撥兵駐守每處各駐兵四名共添駐兵二十  
四名統計應添兵七十名未便在一處裁撥應於  
遵義協存城兵內裁兵二十名仁懷營存城兵內  
裁兵十名又於永安協分駐上卦汛兵內裁兵十  
名落別汛兵內裁兵十名長寨營分駐廣順汛兵  
內裁兵二十名共七十名均撥至溫水場等處分  
駐並將各協營應移之兵遇缺擬補由溫水場等  
處如數招募至現任千總外委二弁毋須更換等

語應如該督等所請遵義協右營右哨千總准其  
移駐溫水場改歸仁懷營管轄其原設外委亦准  
其移至鐵匠塢駐札仍令該督分別司哨造冊報  
部其溫水場原設兵數太少應撥兵三十名鐵匠  
塢向無兵丁今駐有外委應添駐兵十六名又自  
縣城至溫水場之班鳩井火石岡桑木均良村雙  
龍場和村共六處均屬要隘每處撥兵四名駐守  
統計應添兵七十名之處應如所請准其在於遵  
義協存城兵內裁兵二十名仁懷營存城兵內裁  
兵十名又於永安協分駐上卦汛兵內裁兵十名

落別汎兵內裁兵十名長寨營分駐廣順汎兵內  
裁兵二十名共七十名均撥至溫水場等處分駐  
如數招募嗣後遇有疎防失察案件各按管轄汎  
地分別開參以專責成應建衙署兵房除溫水場  
外委廨卽令千總居住毋庸另建外其鐵匠垣駐  
札外委官署及班鳩井等六處塘房均應建置之  
處亦應如該督等所奏辦理應需衙署兵房除將  
溫水場外委公廨卽令千總居住毋庸另建外所  
有經歷外委各署及班鳩井等六處塘房均應建  
置所需經費卽在迤產變價項下動支毋須籌款

查前項添建衙署塘房應令該督飭委委員博節確估將需工料銀兩照例奏核仁懷縣屬逆產田土前據貴州巡撫奏明丈量畝數估變入官現未據造具細冊報部無憑查核應令該督轉飭卽行勘估分別上中下則丈量畝數詳細造冊報部再行核辦其一切未盡事宜應令該督撫分別題咨各部辦理等因道光二十年正月二十日奉

旨依議欽此

創建溫水經歷千總衙署及增設營卡塘房舊准部咨於逆產變價項內開銷嗣因巡撫賀長齡奏

請將逆產所入給貴州省城尚節及幼雨堂奉  
旨俞允今增創衙署塘卡借用工料銀三千二百七十七  
兩悉由黔省籌捐歸款

二十一年五月雨壞

文廟西廡墻廊及賢關門知府黃樂之捐廉修理

並繕冊